



王陽明全集

別錄二

別五冊

特別  
~20  
2059  
6



特  
門 20  
號 3059  
卷 6



河東重刻陽明先生別錄卷之一

奏疏一

陳言邊務疏

弘治十二年特進士

邇者竊見 皇上以彗星之變警戒修省又以虜寇  
猖獗命將出師 宵旰憂勤不遑寧處此誠 聖主  
遇災能警臨事而懼之盛心也當茲多故主憂臣辱  
孰敢愛其死况有一二之見而忍不以上聞耶臣愚  
以為今之大患在於為大臣者外託慎重老成之名  
而內為固祿希寵之計為左右者內挾交蟠蔽壅之  
資而外肆招權納賄之惡習以成俗互相為奸憂世



形勢之金 卷之二 七  
者謂之迂狂進言者日以浮躁沮抑正大剛直之氣  
而養成怯懦因循之風故其衰耗頽塌將至于不可  
支持而不自覺今幸上天仁愛適有邊陲之患是憂  
慮警省易轅改轍之機也此在 陛下必宜自有所  
以痛革弊源懲艾而振作之者矣新進小臣何敢僭  
聞其事以干出位之誅至於軍情之利害事機之得  
失苟有所見是固芻蕘之所可進卒伍之所得言者  
也臣亦何爲而不可之有雖其所陳未必盡合時論  
然私心竊以爲必宜如此則又不可以苟避乖刺而  
遂已於言也謹陳便宜八事以備採擇一曰蓄材

二曰舍短以用長三曰簡師以省費四曰屯田  
以足食五曰行法以振威六曰敷恩以激怒七曰捐  
小以全大八曰嚴守以乘弊何謂蓄材以備急臣惟  
將者三軍之所恃以動得其人則克以勝非其人則  
敗以亡其可以不豫畜哉今者邊方小寇會未足以  
辱偏裨而 朝廷會議推舉固已倉皇失措不得已  
而思其次一二人之外會無可以繼之者矣如是而  
求其克敵致勝其將何恃而能乎夫以南宋之偏安  
猶且宗澤岳飛韓世忠劉錡之徒以爲之將李綱之  
徒以爲之相尚不能止金人之衝突今以一統之大

陽明全集別錄  
求其任事如數子者曾未見有一人萬如虜寇長驅而入不知陛下之臣孰可使以禦之若之何其猶不寒心而早圖之也臣愚以爲今之武舉僅可以得騎射搏擊之士而不足以收韜畧統馭之才今公侯之家雖有教讀之設不過虛應故事而實無所裨益誠使公侯之子皆聚之一所擇文武兼濟之才如今之提學之職者一人以教育之習之以書史騎射授之以韜畧謀猷又於武學生之內歲升其超異者於此使之相與磨礪砥礪日稽月考別其才否比年而校試三年而選舉至於兵部自尚書以下其兩侍郎

使之每歲更迭巡邊於科道部屬之內擇其通變特達者二三人以從因使之得以周知道里之遠近邊關之要害虜情之虛實事勢之緩急無不深諳孰察於平日則一旦有急所以遙度而往蒞之者不慮無其人矣孟軻有云苟爲不畜終身不得臣願自今畜之也何謂舍短以用長臣惟人之才能自非聖賢有所長必有所短有所明必有所蔽而人之常情亦必有所懲於前而后有所警於后吳起殺妻忍人也而稱名將陳平受金貪夫也而爲謀臣管仲被囚而建霸孟明三比而成功顧上之所以駕馭而鼓動之者

何如耳故曰用人之仁去其貪用人之智去其詐用人之勇去其怒夫求才於倉卒艱難之際而必欲拘於規矩繩墨之中吾知其必不克矣臣嘗聞諸道路之言曩者邊關將士以驍勇強悍稱者多以過失罪名擯棄於閑散之地夫有過失罪名其在平居無事誠不可使處於人上至於今日之多事則彼之驍勇強悍亦誠有足用也且彼擯棄之久必且悔艾前非以思奮勵今誠委以數千之衆使得立功自贖彼又素熟於邊事加之以積慣之餘其與不習地利志圖保守者功宜相遠矣古人有言使功不如使過是所

謂使過也何謂簡師以省費臣聞之兵法曰日費千金然後十萬之師舉夫古之善用兵者取用於國因糧於敵猶且日費千金今以中國而禦夷虜非漕輓則無粟非征輸則無財是固不可以言因糧於敵矣然則今日之師可以輕出乎臣以公差在外甫歸旬日遙聞出師竊以爲不必然者何則北地多寒今炎暑漸熾虜性不耐我得其時一也虜恃弓矢今大雨時行筋膠解弛二也虜逐水草以爲居射生畜以爲食今已蜂屯兩月邊草殆盡野無所獵三也以臣料之官軍甫至虜即遁矣夫兵固有先聲而後實者今

阿旅旣行言已無及惟有簡師一事猶可以省虛費而得實用夫兵貴精不貴多今速詔諸將密於萬人之內取精健足用者三分之一而餘皆歸之京師萬人之聲旣揚矣今密歸京師邊關固不知也是萬人之威猶在也而其實又可以省無窮之費豈不爲兩便哉况今官軍之出戰則退後功則爭先亦非邊將之所喜彼之請兵徒以事之不濟則責有所分焉耳今誠於邊塞之卒以其所以養京軍者而養之以其所以賞京軍者而賞之旬日之間數萬之衆可立募於帳下奚必自京而出哉何謂屯田以給食臣惟

兵以食爲主無食是無兵也邊關轉輸水陸千里時頗捐棄十而致一故兵法曰國之貧於師者遠輸也輸則百姓貧近師貴賣貴賣則百姓財竭此之謂也今之軍官既不堪戰陣又使無事坐食以益邊困是與敵爲謀也三邊之戍方以戰守不暇耕農誠使京軍分屯其地給種授器待其秋成使之各食其力寇至則授甲歸屯遙爲聲勢以相犄角寇去仍復其業因以其暇繕完虜所拆毀邊牆亭堡以遏衝突如此雖未能盡給塞下之食亦可以少息輸餽矣此誠持久俟時之道王師出於萬全之長策也何謂行法以

陽明集卷之五  
五  
振威臣聞李光弼之代子儀也張用濟斬於轅門狄  
青之至廣南也陳曙戮於戲下是以皆能振疲散之  
卒而摧方強之虜今邊臣之失機者往往以計倖脫  
朝喪師於東陲暮調守於西鄙罰無所加兵因縱弛  
如此則是陛下不惟不賞之罪而復為曲全之地  
也彼亦何憚而致其死力哉夫法之不行自上犯之  
也今總兵官之頭目動以一二百計彼其誠以武勇  
而收錄之也則亦何不可之有然而此輩非勢家之  
子弟即豪門之寅緣皆以權力而強委之也彼且需  
求刻剝騷擾道路仗勢以奪功無勞而冒賞懈戰士

之心與邊戎之怨為總兵者且復資其權力以相後  
先其委之也敢以不受乎其受之也其肯以不庇乎  
苟戾於法又敢斬之以殉乎是將軍之威固已因此  
輩而索然矣其又何以臨師服衆哉臣願陛下  
勅提督等官發令之日即以先所喪師者斬于轅門  
以正軍法而所謂頭目之屬悉皆禁令發回毋使瀆  
擾侵冒以撓將權則士卒奮勵軍威振肅克敵制勝  
皆原於此不然雖有百萬之衆徒以虛國勞民而亦  
無所用之也何謂敷恩以激怒臣聞殺敵者怨也今  
師方失利士氣消沮三邊之戍其死亡者非其父母

形明之集 別錄 卷之二 六  
子弟則其宗族親戚也。今誠撫其瘡痍，問其疾苦，恤其孤寡，振其空乏。其死者皆無怨尤，則生者自宜感動。然後簡其強壯，宣以國恩，喻以虜讐。明以天倫，激以大義，懸賞以鼓其勇，暴惡以深其怒。痛心疾首，日夜淬礪，務與之俱殺父兄之讐，以報朝廷之德。則我之兵勢日張，士氣日奮，而區區醜虜有不足破者矣。何謂捐小以全大？臣聞之兵法曰：將欲取之，必先固與之。又曰：佯北勿從，餌兵勿食。皆捐小全大之謂也。今虜勢方張，我若按兵不動，彼必出銳以挑戰。挑戰不已，則必設詐以致師，或捐棄牛馬而偽逃，或揜

匿精悍以示弱，或詐潰而埋伏，或潛軍而請和。是皆誘我以利也。信而從之，則墮其計矣。然今邊關守師，人各有心，虜情虛實，事難卒辨。當其挑誘之時，畜而不應，未免小有剽掠之虞。一以為當救，一以為可邀。從之則必陷於危亡之地，不從則又懼於坐視之誅。此王師之所以奔逐疲勞，損失威重，而醜虜之所以得志也。今若恣其操縱，許以便宜，其縱之也不以其坐視其捐之也。不以為失機，養威畜憤，惟欲責以大威，而小小挫失，皆置不問，則我師常逸而兵威無損。此誠勝敗存亡之機也。何謂嚴守以乘弊？臣聞古之



善戰者先爲不可勝以待敵之可勝蓋中國工於自  
守而胡虜長於野戰今邊卒新破虜勢方劇若復與  
之交戰是投其所長而以勝予敵也爲今之計惟宜  
嬰城固守遠斥候以防奸勤間諜以謀虜熟訓練以  
用長嚴號令以肅惰而又類加犒享使皆畜力養銳  
警之積水俟其盈滿充溢而後乘怒急決之則其勢  
并力驟至於崩山漂石而未已昔李牧備邊日以牛  
酒葺士士皆樂爲一戰而牧屢抑止之至其不可禁  
遏而始奮威奔出若不得已而後從之是以一戰而  
破強胡令我食既足我威既盛我怒既深我師既逸

我守既堅我氣既銳則是周悉萬全而所謂不可勝  
者既在於我矣由是我足則虜日以匱我盛則虜日  
以衰我怒則虜日以曲我逸則虜日以勞我堅則虜  
日以虛我銳則虜日以鈍索情較計必將疲罷奔逃  
然後用奇設伏悉師振旅出其所不趨趨其所不意  
迎邀夾攻首尾橫擊是乃以足當匱以盛敵衰以怒  
加曲以逸擊勞以堅破虛以銳攻鈍所謂勝於萬全  
立於不敗之地而不失敵之敗者也右臣所陳非有  
奇特出人之見固皆兵家之常談今之爲將者之所  
共見也但今邊關將帥雖或知之而不能行類皆視

陽物集卷之二  
為常談漫不加省勢有所軼則委於無可奈何事憚  
煩難則為因循苟且是以玩習弛廢一至於此 陛  
下不忽其微乞 勅兵部將臣所奏熟議可否轉行  
提督等官即為斟酌施行毋使視為虛文務欲責以  
實効庶於軍機必有少補臣不勝為 國惓惓之至

乞養病疏

十五年八月時  
官刑部主事

臣原籍浙江紹興府餘姚縣人由弘治十二年二甲  
進士弘治十三年六月除受前職弘治十四年八月  
奉 命前往直隸淮安等府會同各該巡按御史審  
火重囚已行遵奉 奏報外切緣臣自去歲三月忽

患虛弱咳嗽之疾劑灸交攻入秋稍愈遽欲謝去藥  
石醫師不可以為病根既植當復萌芽勉強服飲頗  
亦臻效及奉 命南行漸益平復遂以為無復他慮  
竟廢醫言捐棄藥餌衝冒風寒恬無顧忌內耗外侵  
舊患仍作及事竣北上行至揚州轉增煩熱遷延三  
月疴羸日甚心雖戀 闕勢不能前追誦醫言則既  
晚矣先民有云忠言逆耳利於行良藥苦口利於病  
臣之致此則是不信醫者逆耳之言而畏難苦口之  
藥之過也今雖悔之其可能乎臣自惟田野豎儒粗  
通章句遭遇 聖明竊祿部署未效荅於涓埃懼遂

項於溝壑。螻蟻之私期得暫離職任。投養幽間。苟全  
餘生。庶申初志。伏望 聖恩垂憫。乞 勅吏部容臣  
暫歸原籍。就醫調治。病痊之日。仍赴前項衙門。辦事  
以圖補報。臣不勝迫切願望之至。

乞

有言官去權姦以章

聖德疏

正德元年時官

兵部主事

臣聞君仁則臣直。大舜之所以能隱惡而揚善也。臣邇者竊見 陛下以南京戶科給事中戴銑等上言時事。特 勅錦衣衛差官校拿解赴京。臣不知所言之當理與否。意其間必有觸冒忌諱。上干雷霆

之怒者。但以銑等職居諫司。以言為責。其言而善。自宜嘉納施行。如其未善。亦宜包容隱覆。以開忠讜之路。乃今赫然下令。遠事拘囚。在 陛下之心。不過少示懲創。使其後日不敢輕率妄有論列。非果有意怒絕之也。下民無知。妄生疑懼。臣切惜之。今在廷之臣。莫不以此舉為非宜。然而莫敢為 陛下言者。豈其無憂國愛君之心哉。懼 陛下復以罪銑等者。罪之。下。無補於國事。而徒足以增 陛下之過舉耳。然則自是 陛下雖有上關 宗社危疑不制之事。陛下孰從而聞之。陛下聰明超絕。苟念及此。寧不

寒心况今天時凍沍萬一差去官校督束過嚴銑等  
在道或致失所遂填溝壑使陛下有殺諫臣之名  
興群臣紛紛之議其時陛下必將追咎左右莫有  
言者則既晚矣伏願陛下追收前旨使銑等仍舊  
供職擴太公無我之仁明改過不吝之勇聖德昭  
布遠邇人民胥悅豈不休哉臣又惟君者元首也臣  
者耳目手足也陛下思耳目之不可使壅塞手足  
之不可使痿痺必將惻然而有所不忍臣承乏下僚  
僭言實罪伏覩陛下明旨有政事得失許諸人直  
言無隱之條故敢昧死為陛下一言伏惟俯垂宥

察不勝干冒戰慄之至

自劾乞休疏

十年時官  
鴻臚寺卿

臣由弘治十二年進士歷任今職蓋叨位竊祿十有  
六年中間鰥曠之罪多矣邇者朝廷舉考察之典  
揀汰群僚臣反顧內省點檢其平日正合擯廢之列  
雖以階資稍崇偶幸漏網然其不職之罪臣自知之  
不敢重以欺陛下况其氣體素弱近年以來疾病  
交攻非獨才之不堪亦且力有不任夫幸人之不知  
而鼠竄苟免臣之所甚耻也淑慝混淆使勸懲之典  
不明臣之所甚懼也伏惟陛下明燭其罪以之為

顯罰使天下曉然知不肖者之不得以倖免臣之願  
死且不朽若從未減罷歸田里使得自附於乞休之  
末臣之大幸亦死且不朽臣不勝惶恐待罪之至

乞養病疏

十年  
八月

頃者臣以 朝廷舉行考察自陳不職之狀席藁待  
罪其時臣疾已作然不敢以疾請者人臣鰥曠廢職  
自宜擯逐以彰 國法疾非所言矣 陛下寬恩曲  
成留使供職臣雖冥頑亦寧不知感激自奮及其壯  
齒陳力就列少效犬馬然臣病浸氣弱力不能從其  
心臣自往歲設窳荒夷往來道路前後五載蒙犯瘴

霧魑魅之與游蠱毒之與處其時雖未即死而病勢  
因仍漸肌入骨日以深積後值 聖恩汪濊掩瑕納  
垢復玷清班收歛精魂旋回光澤其實內病潛滋外  
強中稿頃來南都寒暑失節病遂大作且臣自幼失  
母鞠於祖母岑今年九十有六耄甚不可迎侍日夜  
望臣一歸爲訣臣之疾痛抱此苦懷萬無生理 陛  
下至仁天覆惟恐一物不遂其生伏乞放臣暫回田  
里就醫調治使得日見祖母之終臣雖殞越下土未  
啣犬馬帷蓋之恩倘得因是苟延殘喘復爲完人臣  
齒未甚衰暮猶有圖効之日臣不勝懇切願望之至

諫迎佛疏

稿具未上

臣自七月以來切見道路流傳之言以爲陛下遣使外夷遠迎佛者群臣紛紛進諫皆斥而不納臣始聞不信既知其實然獨竊喜幸以爲此乃陛下聖智之開明善端之萌蘖群臣之諫雖亦出於忠愛至情然而未能推原陛下此念之所從起是乃爲善之端作聖之本正當將順擴充迴流求原而乃徂於世儒宗正之說徒爾紛爭力沮宜乎陛下之有所拂而不受忽而不省矣愚臣之見獨異於是乃惟恐陛下好佛之心有所未至耳誠使陛下好佛

之心果已真切懇至不徒好其名而必務得其實不但好其末而必務求其本則堯舜之聖可至三代之盛可復矣豈非天下之幸宗社之福哉臣請爲陛下言其好佛之實陛下聰明聖知昔者青宮固已播傳四海即位以來偶值多故未暇講求五帝三王神聖之道雖或時御經筵儒臣進說不過日襲故事就文敷衍立談之間豈能遽有所開發陛下聽之以爲聖賢之道不過如此則亦有何可樂故漸移志於騎射之能縱心於遊觀之樂蓋亦無所用其聰明施其才力而偶託寄於此陛下聰明豈固遂

安於是而不知此等皆無益有損之事也哉馳逐困  
憊之餘夜氣清明之際固將厭倦日生悔悟日切而  
左右前後又莫有以神聖之道爲 陛下言者故遂  
遠思西方佛氏之教以爲其道能使人清心絕欲求  
全性命以出離生死又能慈悲普愛濟度群生去其  
苦惱而躋之快樂今災害日興盜賊日熾財力日竭  
天下之民困苦已極使誠身得佛氏之道而拯救之  
豈徒息精養氣保全性命豈徒一身之樂將天下萬  
民之困苦亦可因是而蘇息故遂特降 綸音發幣  
遣使不憚數萬里之遙不愛數萬金之費不惜數萬

生靈之困斃不厭數年往返之遲久遠迎學佛之  
是蓋 陛下思欲一洗舊習之非而幡然於高明光  
大之業也 陛下試以臣言反而思之 陛下之心  
豈不如此乎然則 聖知之開明善端之萌蘖者亦  
豈過爲諛言以佞 陛下哉 陛下好佛之心誠至  
則臣請毋好其名而務得其實毋好其末而務求其  
本 陛下誠欲得其實而求其本則請毋求諸佛而  
求諸聖人毋求諸外夷而求諸中國此又非臣之苟  
爲遊說之談以誑 陛下臣又請得而備言之夫佛  
者夷狄之聖人聖人者中國之佛也在彼夷狄則可

用佛氏之教以化導愚頑在我中國自當用聖人之  
道以參贊化育猶行陸者必用車馬渡海者必以舟  
航今居中國而師佛教是猶以車馬渡海雖使造父  
爲御王良爲右非但不能利涉必且有沉溺之患夫  
車馬本致遠之具豈不利器乎然而用非其地則技  
無所施陛下若謂佛氏之道雖不可以平治天下  
或亦可以脫離一身之生死雖不可以參贊化育而  
時亦可以導群品之翬頑就此二說亦復不過得吾  
聖人之餘緒陛下不信則臣請比而論之臣亦切  
嘗學佛最所尊信自謂悟得其蘊奧後乃窺見聖道

之大始遂棄置其說臣請毋言其短言其長者夫西  
方之佛以釋迦爲最中國之聖人以堯舜爲最臣請  
以釋迦與堯舜比而論之夫世之最所崇慕釋迦者  
莫尚於脫離生死超然獨存於世今佛氏之書具載  
始末謂釋迦住世說法四十餘年壽八十二歲而沒  
則其壽亦誠可謂高矣然舜年百有十歲堯年一百  
二十歲其壽比之釋迦則又高也佛能慈悲施捨不  
惜頭目腦髓以救人之急難則其仁愛及物亦誠可  
謂至矣然必苦行於雪山奔走於道路而後能有所  
濟若堯舜則端拱無爲而天下各得其所惟克明峻



德以親九族則九族既睦平章百姓則百姓昭明協和萬邦則黎民於變時雍極而至於上下草木鳥獸無不咸若其仁愛及物比之釋迦則又至也佛能方便說法開悟群迷戒人之酒止人之殺去人之貪絕人之嗔其神通妙用亦誠可謂大矣然必耳提面誨而後能若在堯舜則光被四表格于上下其至誠所運自然不言而信不動而變無爲而成蓋與天地合其德與日月合其明與四時合其序與鬼神合其吉凶其神化無方而妙用無體比之釋迦則又大也若乃詛呪變幻眩怪捏妖以欺惑愚真是故佛氏之所

深排極詆謂之外道邪魔正與佛道相反者不應好佛而乃好其所相反求佛而乃求其所排詆者也陛下若以堯舜既沒必欲求之於彼則釋迦之亡亦已久矣若謂彼中學佛之徒能傳釋迦之道則吾中國之大顧豈無人能傳堯舜之道者乎陛下求之求耳陛下試求大臣之中苟其能明堯舜之道者日日與之推求講究乃必有能明神聖之道致陛下於堯舜之域者矣故臣以爲陛下好佛之心誠至則請毋好其名而務得其實毋好其末而務求其本務得其實而求其本則請毋求諸佛而求諸聖人

母求諸夷狄而求諸中國者果非妄為遊說之談以  
託 陛下者矣 陛下而果能以好佛之心而好聖  
人以求釋迦之誠而求諸堯舜之道則不必涉數萬  
里之遙而西万極樂只在目前則不必糜數萬之費  
斃數萬之命歷數年之久而一塵不動彈指之間可  
以立躋聖地神通妙用隨形隨足此又非臣之繆為  
大言以欺 陛下必欲討究其說則皆鑿鑿可證之  
言孔子云我欲仁斯仁至矣一日克己復禮而天下  
歸仁孟軻云人皆可以為堯舜豈欺我哉 陛下反  
而思之又試以詢之大臣詢之群臣果臣言出於虛

繆則其受欺妄之戮臣不知 諱忌伏見 陛下善  
心之萌不覺踴躍喜幸輒進其將順擴克之說惟  
陛下垂察則 宗社幸甚天下幸甚萬世幸甚臣不  
勝祝望懇切殫越之至專差舍人某具疏奏上以  
聞

辭新任乞以舊職致仕疏

十一年十月時陞南贛金都御史

臣原任南京鴻臚寺卿去歲四月嘗以不職自劾求  
退後至八月又以舊疾交作復乞 天恩放回調理  
皆未蒙 准允黽勉尸素因循日月至今年九月十  
四日忽接吏部恣文蒙 恩陞授前職聞 命驚惶

陽明先生集卷之二  
感泣之餘莫知攸措竊念臣才本庸劣性復迂踈兼  
以疾病多端氣體羸弱待罪鴻臚閒散之地猶懼不  
稱况茲巡撫重任其將何才以堪夫因才器使朝  
廷之大政也量力受任人臣之大分也臚仕顯官臣  
心豈獨不願一時貪倖苟受後至潰政債事臣一身  
戮辱亦奚足惜其如陛下之事何况臣疾病未已  
精力益衰平居無事尚爾奄奄軍旅驅馳豈復堪任  
臣在少年粗心浮氣狂誕自居自後涉歷漸久稍知  
慚沮逮今思之悔創靡及人或未考其實臣之自知  
則既審矣又何敢崇飾舊惡以誤國事伏願陛下

下念朝廷之大政不可輕地方之重寄不可苟體  
物情之有短長憫凡愚之所不逮別選賢能委以茲  
任憫臣之愚不加謫逐容令仍以鴻臚寺卿退歸田  
里以免負乘之誅臣雖顛殛敢忘劬結臣自幼失慈  
鞠於祖母岑今年九十有七旦暮思臣一見為訣去  
歲乞休雖迫疾病實亦因此臣敢輒以螻螻苦切之  
情控於陛下冀得便道先歸省視岑疾少伸反哺  
之私以俟矜允之命臣衷情迫切不自知其觸昧  
條憲臣不勝受恩感激瀆冒戰懼哀懇祈望之至

謝恩疏

十二年正月  
二十六日

臣原任南京鴻臚寺卿正德十一年九月十四日准吏部咨為缺官事該部題奉 聖旨王守仁陞都察院左僉都御史巡撫南贛汀漳等處地方寫 勅與他欽此欽遵臣自以非才多病懼不勝任以致僨事當具本乞 恩辭免容令原職致仕隨於十月二十四日節該欽奉 勅諭爾前去巡撫江西南安贛州福建汀州漳州廣東南雄韶州惠州潮州各府及湖廣郴州地方撫安軍民修理城池禁革奸弊一應地方賊情軍馬錢糧事宜小則徑自區畫大則奏請定奪欽此欽遵外十一月十四日續准兵部咨為緊急

賊情事內開都御史文森遷延誤事見奉 勅書切責乃敢託疾避難奏回養病見今盜賊劫掠民遭荼毒萬一王守仁因見地方有事假託辭免不無愈加誤事該本部題奉 聖旨既地方有事王守仁着上緊去不許辭避遲誤欽此聞報憂慙不惶寧處一面扶疾候 旨至浙江杭州府地方於十二月初二日復准吏部咨該臣 奏為乞 恩辭免新任仍照舊職致仕事奏奉 聖旨王守仁不准休致南贛地方見今多事着上緊前去用心巡撫欽此備咨到臣感恩懼罪之餘不敢冒昧復 請隨於本月初三日起

程至次年正月十六日已抵贛州接管巡撫外伏念  
臣氣體羸弱質性迂踈聊為口耳之學本非折衝之  
才鴻臚閒散尚以疾病而不堪巡撫繁難豈其精力  
之可任但前官以辭疾招議適踵效尤之嫌而聖  
旨以多事為言恐蹈避難之罪遂爾冒於負乘不暇  
震於覆餗黽勉溢事忽已踰旬受恩思效每廢寢  
食顧兵糧耗竭之餘加以師旅而盜賊殘破之後  
方苦於瘡痍尚爾一籌之未展敢云暮月而可觀况  
炎毒舊侵懼復中於瘴癘疴衰日積憂不任於驅馳  
心有餘而才不逮足欲進而力不前徒切感恩之

報莫申效死之誠臣敢不勉其智之所不足竭砥礪  
於已盡其力之所可為付利鈍於天亮無補於河嶽  
亦少致其涓埃稍俟狐鼠巢穴之平終遂糜鹿山林  
之請臣不勝受恩感激

給由疏

十二年二月  
二十五日

臣見年四十六歲係浙江紹興府餘姚縣民籍由進  
士弘治十三年二月內除授刑部雲南清吏司主事  
弘治十五年八月內告回原籍養病弘治十七年七  
月內病痊赴部改除兵部武選清吏司主事正德元  
年十二月內為宥言官去權奸以彰聖德事蒙

陽明集別錄 卷之十一  
恩降授貴州龍場驛丞正德五年三月內蒙陞江  
西吉安府廬陵縣知縣本年十月內陞南京刑部四  
川清吏司主事正德六年正月內調吏部驗封清吏  
司主事本年十月內陞本部文選清吏司員外郎正  
德七年三月內陞本部考功清吏司郎中本年一二  
月初七日蒙陞南京太僕寺少卿正德八年十月二  
十二日到任至正德九年四月二十一日止歷俸六  
箇月本日接到吏部劄付蒙陞南京鴻臚寺卿本月  
二十五日到任至正德十一年九月十四日止連閏  
歷俸二十九箇月零一十日本日准吏部咨蒙 恩

陞都察院右僉都御史巡撫南贛汀漳等府於  
十二年正月十六日前到地方行事支俸起扣至本  
月二十五日止又歷俸十日連前共換歷俸三十六  
箇月三年考滿例應給由緣臣係巡撫官員見在福  
建漳州等府地方督調官軍夾剿漳浦等處流賊未  
敢擅離緣係三年給由事理爲此具本奏 聞

叅失事官員疏 十二年三月十五日

蒙江西按察司整飭兵備帶管分巡嶺北道副使楊  
璋呈據贛州府信豐縣及信豐守禦千戶所各報稱  
正德十二年二月初七日有龍南強賊突來地名崇

仙屯劄已經差委興國縣義民蕭承會同信豐龍南官兵相機剿捕續據申報強賊突來本縣小河住劄離縣約有四十餘里乞要發兵策應又據申報本月初九日有龍南流賊六百餘人突至城下除嚴督軍兵固守城池緣本所縣無兵禦敵誠恐前賊攻城卒難止過乞調峯山弩手并該縣兵夫救護又經差委南安府經歷王祚南康縣縣丞舒富統兵弩手殺手前去約會二縣掌印官并領兵官相機攻圍去後續據縣丞舒富呈本月初十日蒙委統領殺手陳禮飭手吳尚能等共五百名經歷王祚義民蕭承統領

峯山加善雙秀弩手各三百名先後到於信豐縣剿至十一日止有該所管屯千戶林節帶兵四十餘名出城據鄉導馬客等報稱止有強賊六百餘人在地名花園屯劄當同各官將兵分布剗定只見前賊一陣止有百十餘徒先出有前哨義民蕭承領兵就與敵殺斬獲賊級四顆奪獲白旗一面頃刻衆賊出營分爲三哨約有二千餘徒敢知龍南反招賊首黃秀魁糾合廣東龍川縣泃頭賊首池太鬚賊首池大安新總弁池大昇共爲一陣賊首楊金巢自爲一陣勢甚猖獗卑職督統本哨兵快奮勇交鋒殺死賊徒

二十餘人不意賊衆一湧前衝殺手陳禮魴百長鍾德昇等見勢難當俱各不聽約束先行漫散有南康縣報效義士楊習舉等仍與前賊死敵不退俱被戮傷身死及有經歷王祚上馬不便亦被執去賊勢得勝仍要攻城隨與蕭承林節等收集衆兵退至南營山把截遇蒙本道親臨該縣督剿各賊聞知退至牛州離城少遠至十二日前賊差人告招十三日蒙本道差蕭承前去招撫就將經歷王祚放回賊往原巢去訖等因到道備呈到臣隨據龍南縣知縣盧鳳呈稱本縣捕盜主簿周政會同鎮撫劉鏗千戶洪恩統

領機兵旗軍於本月十八日前去信豐縣截捕探得強賊池大鬚黃秀魁等從鴉鵲隘越過安遠縣往劄本職督兵追截前賊已往廣東龍川縣復回原巢洩頭去訖據安遠縣知縣劉瑀稟稱於本月十九日統領水元大石等保民兵弩手前去龍泉等保截剿各賊逃回原巢去訖難以窮追以此掣兵回縣緣由查得先據該道及信豐縣所各稟報前事已經批仰該道兵備等官急調招撫義官葉芳協同石背兵夫斷賊歸路及調峯山弩手與南康打手人等責委縣丞舒富統領前後夾擊又看得此賊既離巢穴利在速



戰仍仰該府急行所屬隣近官司俱要乘險設伏厚  
集以待及於各鄉村往來路徑多張疑兵使賊不敢  
輕易奔突仍調安遠縣知縣劉瑀星夜起集水元大  
石等保民兵一千橫接龍南邀其不備若賊猶屯信  
豐急自龍南直趨瀘頭搗其巢穴賊進無所獲退無  
所處不過旬日可以坐擒仰各遵照施行去後今據  
前因叅看得縣丞舒富承委督剿不能相度機宜輕  
率驟進以致殺傷兵快原其心雖出奮勇責以師律  
均為敗事經歷王祚臨陣潰奔為賊所執後雖倖免  
終係失機信豐所縣知縣黃天爵千戶鄭鐸巡捕副

千戶朱誠惟知固城自守不肯發兵應援龍南知縣  
盧鳳捕盜主簿周政隄備鎮撫劉鏗千戶洪恩地當  
關隘正可防遏坐視前賊往來畧不出兵邀擊千戶  
林節即其兵力之寡似難全責究其失律之罪亦宜  
分受安遠縣知縣劉瑀承調追襲緩不及事俱屬違  
法南康縣百長鍾德昇等臨敵不前故違約束先行  
潰散失設軍機應合處以軍法該道兵備副使楊璋  
守備都指揮同知王泰俱屬提督欠嚴但楊璋往來  
調度卒能招撫前賊計其功勞可以贖罪及招廣東  
龍川縣掌印捕盜等官明知首賊池大鬚等在彼地

方為巢却亦不行時嘗巡邏縱其過境劫掠又各不行乘機追捕俱屬故違所據前項失事官員俱合遵奉 勅諭事理即行提問但前項賊徒擁眾數千變詐百出今雖陽受招撫其實陰懷異圖况其黨與根連三省萬一乘間復出為患必大正係緊關用人陔備之際除將百長鍾德昇等查勘的確處以軍法及方面軍職另行叅究外其餘前項各官且量加督責姑令戴罪陔備各自相機行事勉圖後功以贖前罪仍一面委官前去信豐縣地方查勘前項殺死兵快數目及有無隱匿前項事官另行叅 奏緣係地方

緊急賊情及叅失事官員事理未敢擅便為此

請 旨

閩廣捷音疏

十二年五月初八日

據福建按察司整飭兵備兼管分巡漳南道僉事胡璉呈會同分守右叅政艾洪經理軍務左叅政陳策副使唐澤將領都指揮僉事李胤督據河頭等哨委官指揮徐麒知縣施祥知事曾璠等呈稱各職統領軍兵五千餘人進至長富村等處見得賊眾地險巢穴數多兼且四路裝伏勢甚猖獗尅期於正德十二年正月十八日等各分哨路從長富村至濶竹洋新

陽明先生文錄 卷之二 三十五  
洋大豐五雷大小峯等處與賊交鋒前後大戰數合擒斬首從賊犯黃燁等共計四百三十二名顆俘獲賊屬一百四十六名口燒燬房屋四百餘間奪獲馬牛等項被賊殺死老人許六打手黃富璘等六名餘賊俱各奔聚象湖山拒守各職又統官兵追下蓮花石與賊對劄誠恐賊衆我寡呈乞添兵策應等因到道行據大溪哨指揮高偉呈報統兵約會蓮花石官兵攻打象湖山適遇廣東委官指揮王春等領兵亦至彼境大傘地方卑職與指揮單桓縣丞紀鏞領兵前去會剿不意大傘賊徒突出卑職等奮勇抵戰單

紀鏞馬陷深泥與軍人易成等七名兵快李崇靜等八名俱被截傷身死卑職亦被截二鎗勢難抵敵只得收兵暫回聽候緣象湖山係極高絕險自來官兵所不能攻今賊勢日盛若不添調狼兵稍俟秋冬會舉夾攻恐生他變通行呈稟間續奉本院紙牌爲進兵方畧事備行各職遵奉密諭佯言犒衆退師俟秋再舉密切部勒諸軍乘懈奮擊依蒙密差義官曾崇秀瓜探虛實乘賊怠弛會選精兵一千五百名當先重兵四千二百名繼後分作三路各職統領俱於二月十九日夜御杖直趨三路並進直搗象湖山奪

陽明集卷之二  
其隘口各賊雖已失險但其間賊徒類皆驍勇精悍  
猶能凌蹙絕谷超躍如飛復據上層峻險四面飛打  
衮木礮石以死拒敵我兵奮勇鏖戰自辰至午呼聲  
震天撼搖山谷三司所發奇兵復從間道鼓噪突登  
賊始驚潰大敗我兵乘勝追殺擒斬大賊首黃狃狸  
游四并廣東大賊首蕭細弟郭虎等二百九十一名  
顆得獲賊屬一百三十三名口其間墜崖墮壑死者  
不可勝計奪回水黃牛賊銀鎗刀等物燒燬房屋五  
百餘間餘賊潰散復入流恩山岡等巢與諸賊合勢  
亦被各賊殺死頭目賴順打手楊緣等一十四名次

職分兵追剿指揮高偉推官胡寧道亦由大豐  
顯兵來會仍與前賊交鋒大戰擒斬首從賊犯巫姐  
旺等一百六十三名顆俘獲賊屬一百六名口餘賊  
敗走各又遞入廣東交界黃蠟溪上下樟溪大山去  
訖又據金豐三團哨委官指揮王鑑李誠通判龔震  
等各呈稱賊首詹師富等恃居可塘洞山寨聚糧守  
險勢甚強固各職依奉會議分兵五路連日攻打生  
擒大賊首詹師富江嵩范克起羅招賢等四名餘賊  
敗走復入竹子洞等處大山嘯聚隨又分兵追襲與  
賊連戰擒首從賊犯范與長等二百三十五名顆俘

陽明集別錄 卷之十一 三十一  
獲賊屬八十二名口奪回被虜男婦五名口奪獲馬  
牛等物亦被各賊殺死老人胡文政一名截傷鄉夫  
葉永旺等五名又據指揮徐麒等呈稱黃蠟溪上下  
漳溪與廣東饒平縣并本省永定縣山界相連遵依  
約會廣東官兵并金豐哨指揮常鑑大溪哨推官胡  
寧道等於三月二十一日子時發兵齊至黃蠟廣東  
義民饒四等領兵亦至會合我兵三路進攻賊出拒  
戰甚銳我兵奮勇大噪而前擒斬首從賊犯溫宗富  
等九十一名顆俘獲賊屬一十三名口餘賊敗走各  
兵乘勝追至赤石巖仍與大戰良久賊復大敗又擒

斬首從賊犯游宗成等一百四十六名顆俘獲賊屬  
九十名口又據中營委官指揮張鉞百戶呂希良等  
呈稱願兵追趕黃蠟溪等處逃賊至地名陳呂村遇  
賊拒戰當陣擒斬首從賊犯朱老叔等六十六名顆  
俘獲賊屬八名口各另呈解到道轉解審驗紀功外  
續據委官知府鍾湘呈稱蒙調官兵先後兩月之間  
攻破長富村等處巢穴三十餘處擒斬首從賊犯一  
千四百二十餘名顆俘獲賊屬五百七十餘名口奪  
回被虜男婦五名口燒燬房屋二千餘間奪獲牛馬  
賊仗無算即今脅從餘黨悉願攜帶家口出官投首

陽明集卷之二  
聽撫安插本職遵照兵部 奏行勘合并巡撫都察院節行案牌事理出給告示發委知縣施祥縣丞余道招撫脅從賊人朱宗王翁景璘等一千二百三十五名家口二千八百二十八名口俱經首驗安插復業緣由呈報到道轉呈到臣及據廣東按察司分巡嶺東道兵備僉事等官顧應祥等會呈遵依本院案驗委官統領軍兵會同福建尅期進剿隨奉本院進兵方畧當即遵依揚言班師一面出其不意從牛皮石嶺脚隘等處分爲三哨鼓噪並進賊膽顧不暇望風瓦解節據指揮楊昂王春通判徐璣陳策義官余

黃盛等各報稱於本年正月二十四等日剋破古村木窖禾村大水山柘林等巢生擒大賊首張大背劉烏嘴蕭乾文范端蕭玉即蕭五顯劉劍蘇塔賴隆等并擒斬首從賊犯乘勝前進會同福建官軍尅期夾攻間探知大傘賊徒潰圍殺死指揮單桓縣丞紀鏞等情當即進兵策應各賊畏我兵勢燒巢奔走生擒賊首羅聖欽餘賊退入箭灌大寨合勢乘險併力拒敵蒙委知縣張戩督同指揮張天杰分哨由別路進兵攻破白土村赤石巖等巢直搗箭灌大寨諸賊迎戰我兵奮勇合擊遂破箭灌當陣斬獲首從賊犯共

計二百二十四名顆俘獲賊屬八十四名口及牛馬  
賊仗等物各寨賊黨聞風奔竄已散復聚愈相連結  
各設機險以死拒守各職統兵分兵並進於三月二  
十等日攻破水竹大重坑苦宅溪靖泉溪白羅南山  
等巢直搗洋竹洞三角湖等處前後大戰十餘生擒  
賊首溫火燒張大背雷振蔡晟賴英等并擒斬賊犯  
共一千四十八名顆俘獲賊屬八百三十八名口奪  
獲馬牛賊銀銅錢衣布器仗蕉紗等物前後共計生  
擒大賊首一十四名擒斬賊犯一千二百五十八名  
顆俘獲賊屬九百二十二名口奪獲水黃牛馬一百

三十九頭匹賊仗衣布等物共二千一百五十七件  
疋葛蕉紗九十六斤一兩賊銀三十二兩四錢八分  
銅錢一百四十二文各開報到道收審緣由呈報前  
來卷查先為急報賊情事准兵部咨該本部題已經  
福建廣東總鎮巡按等衙門都御史陳金御史胡文  
靜等會議區畫各該守巡兵備等官欽遵整備糧餉  
起調軍兵約會進剿間臣於本年正月十六日始抵  
贛州地方行事先於本月初三日於南昌地方據兩  
省各官呈稟師期不同事體參錯誠恐彼此推調致  
誤軍機當臣備遵該部咨來事理具開進兵方畧行

仰各官協同上緊密切施行去後續據福建右叅政  
等官艾洪等會呈指揮單桓縣丞紀鏞被大傘賊衆  
突出馬陷深泥被傷身死及據各哨呈稱賊寨險惡  
天氣漸暄我兵遭挫賊勢日甚乞要奏添狼兵候秋  
再舉備呈到臣叅看得各官頗兵不進致此敗衄顯  
是不奉節制故違方畧及照奏調狼兵非惟日久路  
遙緩不及事兼恐師老財費別生他虞且勝敗由人  
兵貴善用當此挫折各官正宜協憤同奮因敗求勝  
豈可輒自退阻倚調狼兵坐失機會臣當日即自贛  
州起程親率諸軍進屯長汀上坑等處一面督令各

官密昭方畧火速進剿立功自贖敢有支吾推調定  
以軍法論處一面查勘失事緣由另行叅奏間隨據  
各呈捷音到臣叅照閩廣賊首詹師富溫火燒等恃  
險從逆已將十年黨惡聚徒動以萬計鼠狐得肆跳  
梁蛇豕漸無紀極劫剽焚驅數郡遭其荼毒轉輸征  
調三省爲之騷然臣等奉行誅剿三月之內遂克殲  
取渠魁掃蕩巢穴百姓解倒懸之苦列郡獲再生之  
安此非 朝廷威德廟堂成算何以及此及照福建  
領兵各官始雖疎於警備稍損軍威終能戮力協謀  
大致克捷論過雖有計功亦多其間福建如俞革胡



陳參政陳策副使唐澤知府鍾湘廣東如僉事顧應祥都指揮僉事楊懋知縣張戩才調俱優勞勩尤著伏乞俯從惟重之典以作敢戰之風除將二省兵快量留防守其餘悉令歸農及將功次另行勘報外原係捷音事理為此具本題 奏

申明賞罰以厲人心疏

十二年五月初八日

據江西按察司整飭兵備帶管分巡嶺北道副使楊璋呈伏覩 大明律內該載失誤軍事條頗兵官已承調遣不依期進兵策應若承差告報軍期而違限因而失誤軍機者並斬從軍違期條若軍臨敵境託

故違期三日不至者斬主將不固守條官軍臨陣先退及圍困敵城而逃者斬此皆罰典也及查得原擬直隸山東江西等處無剽流賊陞賞事例一人弁一人為首就陣擒斬以次副賊一名者五兩二名者十兩三名者陞實授一級不願者賞十兩陣亡者陞一級俱世襲不願者賞十兩擒斬從賊六名以上至九名者止陞實授二級餘功加賞不及六名除陞一級之外扣算賞銀三人四人五人以上共擒斬以次副賊一名者賞銀十兩均分從賊一名者賞五兩均分領軍把總等官自斬賊級不准陞賞部下獲功七十

名以上者陞署一級五百名者陞實授一級不及數者量賞一人捕獲從賊一名者賞銀四兩二名者賞八兩三名者陞一級以次劇賊一名者陞署一級俱不准世襲不願者賞五兩此皆賞格也賞罰如此宜乎人心激勤功無不立然而有未能者蓋以賞罰之典雖備然罰典止行於參提之後而不行於臨陣對敵之時賞格止行於大軍征剿之日而不行於尋常用兵之際故也且以嶺北一道言之四省連絡盜賊淵數近年以來如賊首謝志珊高快馬黃之魁池大鬢之屬不時攻城掠鄉動輒數千餘徒每

督兵

剿不過遙爲聲勢俟其解圍退散卒不能取決一戰者以無賞罰爲之激勸耳合無申明賞罰之典今後但遇前項賊情領兵官不拘軍衛有司所領兵衆有退縮不用命者許領兵官軍前以軍法從事領兵官不用命者許總統兵官軍前以軍法從事所統兵衆有能對敵擒斬功次或赴敵陣亡從實開報覆勘是實轉達奏聞一體陞賞至若生擒賊徒鞫問明白即時押赴市曹斬首示衆庶使人知警畏亦與見行事例決不待時無相悖戾如此則賞罰既明人心激勵盜賊生發得以即時撲滅糧餉可省事功可見矣具

呈到臣卷查三省盜賊二三年前總計不過三千有餘今據各府州縣兵備守備等官所報已將數萬蓋已不啻十倍於前臣嘗深求其故詢諸官僚訪諸父老采諸道路驗諸田野皆以爲盜賊之日滋由於招撫之太濫招撫之太濫由於兵力之不足兵力之不足由於賞罰之不行誠有如副使楊璋所議者臣請因是爲 陛下畧言其故盜賊之性雖皆兇頑固亦未嘗不畏誅討夫惟爲之而誅討不及又從而招撫之然後肆無所忌蓋招撫之議但可偶行於無辜脅從之民而不可常行於長惡怙終之寇可一施於

心向化之徒而不可屢施於隨招隨叛之黨南贛之盜其始也被害之民恃官府之威令猶或聚衆而與之角鳴之於官而有司者以爲旣招撫之則皆置之不問盜賊習知官府之不彼與也益從而讐脅之民不任其苦知官府之不足恃亦遂靡然而從賊由是盜賊益無所畏而出劫日頻知官府之必將已招也百姓益無所恃而從賊日衆知官府之必不能爲已地也夫平良有冤苦無伸而盜賊乃無求不遂爲民者困征輸之劇而爲盜者獲犒賞之勤則亦何苦而不彼從乎是故近賊者爲之戰守遠賊者爲之鄉導

處城郭者爲之交接在官府者爲之間諜其始出於  
避禍其卒也從而利之故曰盜賊之日滋由於招撫  
之太濫者此也夫盜賊之害神怒人怨孰不痛心而  
獨有司者必欲招撫之亦豈得已哉誠使強兵悍卒  
足以殲渠魁而蕩巢穴則百姓之憤雪地方之患除  
功成名立豈非其所欲哉然而南頓之兵素不練養  
類皆脆弱驕惰每遇征發追呼拘攝旬日而始集約  
束齎遣又旬日而始至則賊已捆載歸巢矣或猶遇  
其未退望賊塵而先奔不及交鋒而已敗以是禦寇  
猶驅群羊而攻猛虎也安得不以招撫爲事乎故九

南頓之用兵不過文移調遣以苟免坐視之罰應  
剿捕聊爲招撫之媒求之實用斷有不敢何則兵力  
不足則剿捕未必能克剿捕不克則必有失律之咎  
則必征調日繁督責日至糾舉論劾者四面而起往  
往坐視而至於落職敗名者有之招撫之策行則可  
以安居而無事可以無調發之勞可以無戴罪殺賊  
之責無地方多事不得遷轉之滯夫如是孰不以招  
撫爲得計是故寧使百姓之荼毒而不敢出一卒以  
抗方張之虜寧使孤兒寡婦之號哭顛連疾苦之無  
告而不敢提一旅以忤反招之賊蓋招撫之議其始

陽明集別錄 卷之二 卅五  
也出於不得已其卒也遂守以爲常策故曰招撫之  
太濫由於兵力之不足者此也古之善用兵者驅市  
人而使戰收散亡之卒以抗強虜今南贛之兵尚足  
以及數千豈盡無可用乎然而金之不止鼓之不進  
未見敵而亡不待戰而北何者進而效死無爵賞之  
勸退而奔逃無誅戮之及則進有必死而退有幸生  
也何苦而求必死乎吳起有云法令不明賞罰不信  
雖有百萬何益於用凡兵之情畏我則不畏敵畏敵  
則不畏我今南贛之兵皆畏敵而不畏我欲求其用  
安可得乎故曰兵力之不足由於賞罰之不行者此

也今 朝廷當罰之典固未嘗不具但未申明而舉  
行耳古者賞不踰時罰不後事過時而賞與無賞後同  
事而罰與不罰同况過時而不賞後事而不罰其亦  
何以齊一人心而作興士氣是雖使韓白爲將亦不  
能有所成况如臣等腐儒小生才識昧劣而素不知  
兵者亦復何所冀乎議者以南贛諸處之賊連絡數  
郡蟠據四省非奏調狼兵大舉夾攻恐不足以掃蕩  
巢穴是固一說也然臣以爲狼兵之調非獨所費不  
貲兼其所過殘掠不下於盜大兵之興曠日持久聲  
勢彰聞比及舉事諸賊渠魁悉已逃遁所得者不

過老弱脅從無知之氓於是乎有橫懼之慘於是乎有妄殺之弊班師未幾而山林之間復已呼嘯成群此皆往事之已驗者臣亦近揀南贛之精銳得二千有餘部勒操演畧有可觀誠使得以大軍誅討之賞罰而行之乎時假臣等以便宜行事不限以時而惟成功是責則比於大軍之舉臣竊以爲可省半費而收倍功臣請以近事證之臣於本年正月十五日抵贛卷查兵部所咨申明律例今後地方但有草賊生發事情緊急該管官司即便依律調撥官軍乘機剿捕應合會捕者亦就調發策應但係軍情火速差

人申奏敢有遲延隱匿巡撫巡按三司官即便參問依律罷職克軍等項發落雖不係聚眾草賊但係有名強盜肆行劫掠賊勢兇惡或白晝攔截或明火持挾不拘人數多少一面設法緝捕即時差人申報合于上司并具申本部知會處置如有仍前朦朧隱蔽不即申報以致聚眾滋蔓貽患地方從重叅究決不輕貸等因題奉 欽依備行前來時以前官又缺未及施行臣即刊印數千百紙通行所屬布告遠近未及一月而大小衙門以賊情來報者接踵亦遂屢有斬獲一二人或五六人七八人者何者兵得隨特調

陽明集卷之十一  
卅七  
用而官無觀望掣肘則自然無可推託逃避思効其力田此言之律例具存前此惟不申明而舉行耳今使賞罰之典悉從而申明之其獲效亦未必不如是之速也伏望 皇上念盜賊之日熾哀民生之日蹙憫地方荼毒之愈甚痛百姓冤憤之莫伸特 勅兵部俯采下議特假臣等 令旗令牌使得便宜行事如是而兵有不精賊有不滅臣等亦無以逃其死夫任不專權不重賞罰不行以致於僨軍敗事然後選重臣假以總制之權而徃拯之縱善其後已無救於其所失矣臣才識淺昧且體弱多病自度不足以辦

此行從 陛下乞骸骨苟全餘喘於林下但今方待罪此心知其弊不敢不為 陛下盡言 陛下從臣之請使後來者得効其分寸收討賊之功臣亦得以少逭死罪於萬一緣係申明賞罰以勵人心事理為此具本請 旨

攻治盜賊二策疏

十二年五月二十八日

據江西按察司整飭兵備帶管分巡嶺北道副使楊璋呈奉臣批據南安府申大庾縣報正德十二年四月內被輦賊四百餘人前來打破下南等寨續被上猶橫水等賊七百餘徒截路打寨劫殺居民又據南

陽明全集別錄 卷之二 卅八  
康縣報輦賊一夥突來龍句保虜劫居民續被輦賊  
三百餘徒突來坊民郭加瓊等家擄捉男婦八十餘  
口耕牛一百餘頭又有輦賊一陣虜劫上長龍鄉耕  
牛三百餘頭男婦子女不知其數又據上猶縣申被  
橫水等村輦賊糾同逃民四散虜劫人財續據三門  
總甲蕭俊報輦賊與逃民約有數百在於地名梁灘  
虜牽人牛本月十六日准本縣捕盜主簿利昱牒報  
輦賊劫打頭里茶坑等處駐劄未散已關統兵官縣  
丞舒富等前去追剿賊已退回橫水等巢去訖各申  
本院批兵備道議處回報案照四月初五日據南康

府呈同前事彼時本院見在福建漳州督兵未回殊  
知前賊向往行查未報續據龍南縣稟被廣東泃頭  
等處強賊池大鬚等三千餘徒突來攻圍總甲王受  
寨所又經會委義官蕭承調兵前去會剿隨據本縣  
呈前賊退去訖等因又查得先據南康縣申稱上猶  
賊首謝志珊糾合廣東賊首高快馬統衆二千餘徒  
攻圍南康縣治殺損官兵已經議委知府邢珣等查  
勘失事緣由呈報外續該兵部題咨巡撫都御史孫  
燧會同南贛都御史王守仁將前項賊犯謝志珊等  
量調官軍設法剿捕務期盡絕應該會同兩廣鎮巡



官行事照例約會施行題奉 欽依轉行查勘前賊  
見今有無出沒及曾否集有兵糧相度機宜即今可  
否剿捕惟復應會兩廣調集軍馬待時而動務要查  
議明白處置停當具由呈報仍督各該地方牢固把  
截用心防守以備不虞等因隨奉本院案驗議照前  
賊連絡三省盤據千里必須三省之兵剋期並進庶  
可成功但今湖廣已有偏橋苗賊之征廣東又有府  
江徭僮之伐雖欲約會夾攻目今已是春深雨水連  
綿草木茂盛非惟緩不及事抑且虛糜糧餉合無一  
回募兵練武防守愈嚴積穀貯糧軍需大備告招者

俯順其情暫且招安肆惡者乘其間隙量搗其穴俟  
三省約會停當然後大舉庶有備無患事出萬全通  
行呈詳去後今奉前因隨會同分守左叅議黃宏守  
備都指揮同知王泰查勘得南安府所屬大庾南康  
上猶三縣除賊巢小者未計其大者總計二十餘處  
有名大賊首有謝志珊志海志全楊積榮賴文英藍  
瑤陳曰能蔡積昌賴文總劉通劉受蕭居謨陳尹誠  
簡永廣蔡積慶蔡西薛文高洪祥徐華張祥劉清才  
譚曰貞蘇景祥藍清奇朱積厚黃金瑞藍天鳳藍文  
亨鍾鳴 鍾法官王行雷明總唐洪劉元滿所統賊

陽明集別錄 卷之二 四十一  
衆約有八千餘徒且與湖廣之桂陽桂東魚黃聶水  
老虎神仙秀才等巢廣東之樂昌巢穴相聯盤據流  
劫三省爲害多年贛州之龍南因與廣東之龍川泃  
頭賊巢接境被賊首池大鬚大安大升給合龍南賊  
首黃秀魁賴振祿鍾萬光王金巢鍾萬貴古興鳳陳  
倫鍾萬璇杜思碧孫福榮黃萬珊黃秀珏羅積善王  
金曾子柰王金柰王洪羅鳳璇黎用璇黃本瑞鄭文  
鉞陳秀玳陳珪劉經藍斌黃積秀等所統賊衆約有  
五千餘徒不時越境流劫信豐龍南安遠等縣已經  
夾攻三次俱被漏網所據前賊占據居民田土數千

高頃殺虜人民尤難數計攻圍城池敵殺官兵焚燒  
屋廬姦汙妻女其爲荼毒有不忍言神人之所共怒  
天討所當必加者也今聞廣湖二省用兵將畢夾攻  
之舉亦惟其時但深山茂林東奔西竄蕪之本道兵  
糧寡弱必須那借京庫折銀三萬餘兩動調狼兵數  
千前來協力約會三省並進夾攻庶可噍類無遺等  
因又據廣東樂昌縣知縣李增稟稱本年二月內有  
東山賊首高快馬等八百餘徒在地名櫃頭村行劫  
又據乳源縣稟報賊徒千餘在洲頭街等處打劫備  
申照詳及據湖廣整飭柳桂等處兵備副使陳壁呈

稱本年二月內據黃砂保走報廣東強賊三百餘徒突出攻劫又據宜章所飛報樂昌縣山峒苗賊二千餘衆出到九陽等處搜山捉人未散又報東西二山首賊發票會集四千餘徒聲言要出桂陽等處攻城又報江西長流等峒峯賊六百餘徒又一起四百餘徒各出劫掠及據桂東縣申報強賊一起七百餘徒前到本縣殺人祭旗捉擄男婦未散又據桂陽縣報強賊六百餘徒聲言要來攻寨等因各稟報到道看得前項苗賊四山會集報到之數將及萬餘我兵寡弱防守尚且不足敵戰將何以支况柳桂所屬永興

等縣原無城池防守地方重計實難爲處伏望軫念荼毒請軍追捕等因又據柳州桂陽縣申本縣四面俱係賊巢正德三年以來賊首龔福全等作亂殺死守備都指揮鄧旻雖蒙征剿惡黨猶存正德七年兵備衙門計將賊首龔福全招撫給與冠帶設爲徭官賊首高仲仁李賓黎穩梁景聰扶道全劉付與李王景陳賓李聰曹永通謝志珊給與衣巾設爲老人未及兩月已出要路劫殺軍民動輒百千餘徒號稱高快馬遊山虎金錢豹過天星密地蜂總兵等名目隨處流劫正德十一年七月內龔福全張打旗號僭稱

延溪王李賓黎穩梁景聰僭稱總兵都督將軍名目  
各穿大經虜民擡轎展打涼傘擺列頭踏響器其餘  
徭賊俱乘馬匹千數餘徒出劫樂昌及江西南康等  
縣拒敵官軍後蒙撫諭將賊首高仲仁李賓給與冠  
帶重設徭官未寧半月仍前出劫本年正月十六日  
一起八百餘徒出劫樂昌縣擄捉知縣韓宗堯劫庫  
劫獄又一起七百餘徒打劫生員譚明浩家一起六  
百餘徒從老虎等峒出劫一起五百餘徒從興寧等  
縣出劫切思前賊陽從陰背隨撫隨叛目今徭賊萬  
餘聚集山峒聲言要造呂公大車攻打州縣城池官

民徬徨呈乞轉達請調三省官軍來剿等情各備申  
到臣除備行江西廣東湖廣三省該道守巡兵備守  
備等官嚴督各該府州縣所掌印巡捕巡司把隘隄  
備等官起集兵快人等加謹防禦相機截捕去後查  
得先因地方盜賊日熾民被荼毒竊計兵力寡弱既  
不足以防遏賊勢事權輕撓復不足以齊一人心乞  
要申明賞罰假臣等 令旗令牌使得便宜行事庶  
幾舉動如意而事功可成已經具題間今復據各呈  
申前因臣等參看得前項賊徒惡貫已盈神怒人怨  
譬之疽癰之在人身若不速加攻治必至潰肺决腸

然而攻治之方亦有二說若 陛下假臣等以賞罰重權使得便宜行事期於成功不限以時則兵衆既練號令既明人知激勵事無掣肘可以伸縮自由相機而動一寨可攻則攻一寨一巢可撲則撲一巢量其罪惡之淺深而爲撫剿度其事勢之緩急以爲後先如此亦可以省供饋之費無征調之擾日剪月削使之漸盡灰滅此則如昔人拔齒之喻日漸動搖齒拔而兒不覺者也然而今此下民之情莫不欲大舉夾攻以快一朝之忿蓋其怨恨所激不復計慮其他必湏南調兩廣之狼達西調湖湘之土兵四路並進

一鼓成擒庶幾數十年之大患可除千萬人之積戩可雪然此以兵法十圍五攻之例計賊二萬湏兵十萬日費千金殆於道路不得操事者七十萬家積粟料財數月而事始集刻期舉謀又數月而兵始交聲迹彰聞賊強者設險以拒敵黠者挾類而深逃迨於鋒刃所加不過老弱脅從且狼兵所過不城於盜轉輸之苦重困於民近年以來江西有姚源之役瘡痍甫起福建有汀漳之寇軍旅未旋府江之師方集於兩廣偏橋之討未息於湖湘蕪之杼軸已空種不入土而營建所輸四征未已誅求之刻百出方新若復

陽明集別錄 卷之二 四四  
加以大兵民將何以堪命此則一拔去齒而兒亦隨斃者也夫由前之說則如臣之昧劣實懼不足以堪事必擇能者任之而後可若大舉夾攻誠可以分咎而薄貴然臣不敢以身謀而廢國議惟 陛下擇其可否斷而行之緣係地方緊急賊情事理爲此具本請旨

類奏擒斬功次疏

十二年五月二十八日

據江西按察司整飭兵備帶管分巡嶺北道副使楊璋呈正德十二年二月二十等日據贛州府龍南縣申總甲王受等呈蒙差各役領兵與同已招大賊首

黃秀璣等前往安遠截捕流賊賴振祿等行至地名湖江背不料黃秀璣反招主令伊弟黃大滿黃細滿等沿途打搶民財放火燒燬民人劉必甫等房屋仍與賊首賴振祿等連謀行劫本役督率兵快人等前到地名黎坑際下與賊對敵當陣殺獲賊首黃秀璣黃大滿黃細滿黃積瑜首級四顆奪獲黃黑旗二面殺死賊徒三十餘名本月初九日又有廣東潮頭老賊首池大鬚串同反招賊首黃秀魁陳秀顯等糾衆四百餘徒打劫千長何甫等家本役又率兵夫至地名陳坑水與賊交鋒殺獲首從賊人陳秀顯等

陽明集別錄 卷之一 四十一  
一十二顆奪獲紅旗一面大小黃牛五頭餘賊歸巢  
去訖及據南安府申據大庾縣監長張德報稱湖廣  
桂陽縣魚黃峒峯賊首唐飛劔總兵嚴宗清千總賴  
必等糾衆劫虜當起兵夫追至界首南流劫與賊對  
敵殺獲唐飛劔嚴宗清首級二顆及南安縣申准縣  
丞舒富關峯賊三百餘人出劫當有保長王萬湖等  
帶領鄉兵擒捕殺獲賊級一顆生擒賊二名奪回被  
虜人口三名口奪獲黃牛二頭各解報到道審驗明  
白等因又據廣東按察司分巡嶺南道僉事黃昭呈  
韶州府乳源縣知縣沈淵申稱本年二月十八日有

東山徭賊首高快馬等衆突來城外并附近鄉村打  
劫欲行攻陷南城當即起集鄉兵及打手民壯固守  
城池及相機與敵射傷賊徒三名各賊退在北城外  
剗營隨調深峒等處士兵協力奮勇與賊交鋒射傷  
賊徒二十餘名射死賊徒一十六名奪回被虜人口  
三十二名口又據捕盜老人梁貞等殺獲賊級二顆  
生擒賊徒一名及據樂昌縣知縣李增申強賊六百  
餘徒出劫當集打手兵壯前去截捕到地名雲門寺  
與賊交鋒斬獲賊級二十四顆生擒賊徒二名奪獲  
馬七匹又據曲江縣徭總盤宗興等擒獲賊徒一名

陽明集卷之十一  
四六  
奪獲馬一匹各呈解到道審驗是實等因并據潮州府揭陽縣申流賊劫長樂海豐等縣黃議官等家隨調兵快行至地名長門徑與賊對敵擒獲賊徒張宏福王本四等一十六名俘獲賊婦二口及據惠州府申准捕盜通判徐璣牒稱流賊一夥約有八十餘徒圍劫新田屯徐百戶等家當督兵快打手追殺至地名馬駿逕擒獲賊徒杜棟等四名殺獲賊級一顆又督總甲鄭全等在地名葵頭障擒獲賊徒張仔等一十二名及千長彭伯璿等率兵擒獲賊徒黃貴等一十五名殺獲賊級一顆俘獲賊婦一口又有總甲黃

廷珠追獲賊徒雷進保等八名俱解赴嶺東道審驗等因及據湖廣柳桂等處兵備副使陳壁守備指揮同知李璋各呈廣東苗賊一千餘徒出劫興寧等處當起郴州殺手令閑住千戶孔世傑等管領追襲至地名大田橋遇賊當陣擒斬首從賊人龐庸等三十二名顆奪獲賊仗四十七件馬騾五匹奪回被虜人口三百五十名口并據老人劉宣等捕獲賊徒雷克恕等六名俘獲婦女三口甲報到道審驗明白各備由呈申開報到臣先為巡撫地方事節該欽奉 勅命爾巡撫江西南安贛州福建汀州漳州廣東南雄



陽明集別錄 卷之二 四七  
韶州惠州潮州各府及湖廣柳州地方但有盜賊生  
發即便設法剿捕欽此欽遵已經備行各道守巡兵  
備守備等官嚴督府衛所州縣掌印捕盜等官起集  
父子鄉兵及顧募打手殺手弩手人等各於賊行要  
路去處加謹防禦遇有盜賊出沒就便相機截捕獲  
功呈報以靖地方今據各呈除行各該兵備等官將  
斬獲賊級閱驗明白發仰梟首生擒賊犯問招回報  
俘獲賊屬并牛馬賊物俱變賣價銀入官與器械俱  
貯庫被虜人口給親完聚獲功人員照例量行給賞  
外緣係擒獲功次事理為此具本題 知

添設清平縣治疏

十二年五月二十八日

據福建按察司兵備僉事胡璉呈奉本院批據漳州  
府呈准知府鍾湘關據南靖縣儒學生員張浩然等  
遠各呈稱南靖縣治僻在一隅相離廬溪平和長樂  
等處地里遙遠政教不及小民罔知法度不時劫掠  
鄉村肆無忌憚釀成大禍人日動三軍之衆合二省  
之威雖曰殲厥渠魁掃除黨類此特一時之計未爲  
久遠之規乞於河頭中營處所添設縣治引帶汀潮  
喉襟清寧人煙輳集道路適均政教既敷盜賊自息  
考之近日龍巖添設漳平而寇盜以靖上杭添設求

四日金卷之二  
卷之二  
四八  
定而地方以寧此皆明驗今若添設縣治可以永保  
無虞等情又據南靖縣義民鄉老曾敦立林大俊等  
呈稱河頭地方北與盧溪流恩山岡接徑西南與平  
和象湖山接境而平和等鄉又與廣東饒平縣大傘  
箭灌等鄉接境皆係窮險賊巢兩省民居相距所屬  
縣治各有五日之程名雖分設都圖實則不聞政教  
往往相誘出劫一呼數千所過荼毒有不忍言正德  
二年雖蒙統兵剿捕未曾設有縣治不過數月遺黨  
復興今蒙調兵剿撫雖少寧息誠恐漏網之徒復踵  
前弊呈乞添設縣治以控制賊巢建立學校以移易

風俗庶得久安長治等因蒙漳南道督同本職與南  
靖縣知縣施祥帶頌耆民曾敦立等并山人洪欽順  
等親詣河頭地方踏得大洋陂背山面水地勢寬平  
周圍量度可六百餘丈西接廣東饒平北聯三團盧  
溪堪以建設縣治合將南靖縣清寧新安等里漳浦  
縣二三等都分割管攝隨地糧差及看得盧溪枋頭  
坂地勢頗雄宜立巡檢司以為防禦就將小溪巡檢  
司移建仍量加編弓兵點選鄉夫協同巡邏遇有盜  
賊隨即撲捕再三審據通都民人合詞執稱南靖地  
方極臨邊境盜賊易生上策莫如設縣况今奏凱之

易同金卷之二  
卷之二  
四八

陽明先生集卷之二  
四九  
後軍餉錢糧尚有餘剩各人亦願鑿山採石挑土築城砍伐樹木燒造輒瓦數月之內工可告成爲照南靖縣相離盧溪等處委的寫遠難以隄防管束今欲於河頭添設縣治枋頭坂移設巡檢司外足以控制饒平隣境內足以壓服盧溪諸巢又且民皆樂從不煩官府督責誠亦一勞永逸事頗相應具呈到道呈乞照詳等因奉批看得開建縣治控制兩省徭寨以莫數邑民居實亦一勞永逸之圖但未經查勘奏請仍仰該道會同始議各官再行該府拘集父老子弟及地方新舊居民審度事體斟酌利害如果遠近無

不稱便軍民又皆樂從事已舉與勢難中輟即便具由呈來以憑奏請定奪仍一面俯順民情相度地勢就於建縣地內預行區畫街衢并巷務要均適端方可以永久無弊聽從願徙新舊人民各先占地建屋任便居住其縣治學校倉場及一應該設衙門姑且規留空址待奏准 命下之日以次建立仍一面通行鎮巡等衙門公同會議此係設縣安民地方重事各官務要計處周悉經畫審當毋得苟且雷同致貽後悔批呈作急勘報等因依蒙拘集坊郭父老及河頭新舊居民再三詢訪各交口稱便有地者願歸官

陽明集卷之五  
卷之一  
五十  
丈量以建城池有山者願聽上砍伐以助木石有人  
力者又皆忻然相聚挑築土基業已重成惟恐上議  
中止下情難遂等情具呈到臣為照建立縣治固係  
禦盜安民之長策但當大兵之後繼以重役竊恐民  
或不堪臣時督兵其地親行訪詢父老諏咨道路衆  
口一詞莫不舉手願望仰心樂從旦夕皇皇惟恐或  
阻臣隨遣人私視其地官府未有教令先已伐木畚  
土雜然並作裹糧趨事相望於道究其所以皆緣數  
邑之民積苦盜賊設縣控禦之議父老相沿已久人  
心冀望甚渴皆以為必須如此而後百年之盜可散

數邑之民可安故其樂事勸工不令而速臣觀河頭  
形勢實係兩省賊寨咽喉今象湖可塘大傘箭灌諸  
巢雖已破蕩而遺孽殘黨亦寧無有逃匿山谷者舊  
因縣治不立征剿之後浸復歸據舊巢亂亂相承皆  
原於此今誠於其地開設縣治正所謂撫其背而扼  
其喉盜將不解自散行且化為善良不然不過年餘  
必將復起其時再聚兩省之兵又糜數萬之費圖之  
已無及矣臣竊以為開縣治於河頭以控制群巢於  
勢為便雖使民甚不欲猶將強而從之况其祝望欣  
趨若此亦何憚而不為至於移廵司於枋頭坂亦於

事勢有不容已蓋河頭者諸巢之咽喉枋頭者河頭之唇齒勢必相須兼其事體已有成規不過遷移之勞所費無幾臣等皆已經畫區處大畧已備不過數月可無督促而成民之所未敢擅為者惟縣治學校須命下之日乃舉行耳伏願陛下俯念一方荼毒之久深惟百姓永遠之圖下臣等所議於該部採而行之設縣之後有不如議臣無所逃其責今新撫之民群聚於河頭者二千有餘皆待此以息其反側若失今不圖衆心一散不可以復合事機一去不可以復追後有噬臍之悔徒使臣等得以為辭然已無

救於事矣緣係添設縣治永保地方事理為此具本請旨

疏通鹽法疏

十二年六月十五日

據江西按察司整飭兵備帶管分巡嶺北道副事楊璋呈奉巡撫江西右副都御史孫燧案驗准兵部咨行移各該巡撫官員今歲俱免赴京議事各要在彼修舉職業若有重大軍務應議事件益於政體便於軍民者明白條陳聽會官計議奏請等因已經行仰所屬查訪去後隨據吉安臨江袁州等府萬安泰和清江宜春等縣商民彭拱劉常郭閏彭秀連名狀告

正德六年蒙上司明文行令贛州府起立抽分鹽廠  
告示商民但有販到閩廣鹽課由南雄府曾經折梅  
亭納過勸借銀兩止在贛州府發賣者免其抽稅願  
裝至袁臨吉三府賣者每十引抽一引閩鹽自汀州  
過會昌羊角水廣鹽自黃田江九渡水來者未經折  
梅亭在贛州府發賣每十引抽一引願裝至袁臨吉  
三府發賣每十引又抽一引疏通四年官商兩便正  
德九年十月內又蒙贛州府告示該奉勘合開稱廣  
鹽止許南贛二府發賣其袁臨吉不係舊例行鹽地  
方不許越境以致數年廣鹽禁絕淮鹽因怯河道逆

流灘石險阻止於省城三府居民受其高價之苦客  
商阻塞買賣之源乞賜俯念吉臨等府與贛州地里  
相連自昔至今惟食廣鹽一向未經禁革况廣鹽許  
于南贛二府發賣原亦不係洪武舊制乃是正統年  
間爲建言民情事奉總督兩廣衙門奏行新例如蒙  
將廣鹽查照南贛事例照舊疏通下流發賣萬民幸  
甚等因又據贛州府抽分廠委官照磨汪德進呈近  
奉勘合禁止廣鹽止許南贛發賣不許下流但贛州  
吉安地里相連水路不過一日之程今年夏驟雨泛  
漲雖有橋船阻隔水勢洶惡衝斷橋索以致奸商計

陽明集卷之二  
五三  
乘水勢聚積百船執持克器用強越過後雖拏獲數  
起問罪不過十之一二又有投托勢要官豪夾帶下  
流發賣者又有挑擔馱載從興國贛縣南康等處小  
路越過發賣者其弊多端不禁則違事例禁止則勢  
所難行呈乞議處等因卷查正德六年奉總制江西  
等處地方軍務左都御史陳金批據江西布政司呈  
准本司右布政使任漢咨稱查得江西十三府俱係  
兩淮行鹽地方湖西嶺北二道灘石險惡淮鹽因而  
不到商人徃徃越境私販廣鹽射利肥已先蒙總督  
衙門奏准廣鹽許行南贛二府發賣仰令南雄照引

通水納價類解梧州軍門官商兩便軍餉充足當時  
止是奏行南贛不曾開載袁臨吉三府合無遵照  
勅諭便宜處置暫許廣鹽得下表臨吉三府地方發  
賣立廠盤掣以助軍餉及據江西按察司兵備副使  
王秩亦呈前事隨該三司布政等官劉果等議得委  
果於事有益於法無礙呈詳批允前來遵照立廠照  
例抽稅外正德九年十月內准戶部咨該巡撫都御  
史周南題該本部覆議內開廣東鹽課仍照正德三  
年題奉 欽依事理有引官鹽許於南贛二府發賣  
不許再行抽稅袁臨吉不係舊例行鹽地方不許到

彼如有犯者不分有引無引俱照律例問罪沒官又經行仰禁革去後今據前因隨查得正德六年十一月二十七日設立抽分廠起至正德九年五月終止共抽過稅銀四萬八百四十餘兩陸續奉撫鎮衙門明文支發三省夾攻大帽山等處賞功軍餉并犒勞過狼兵官軍土兵口糧并取赴饒州征剿姚源軍前應用及起造抽分廠廳浮橋修理城池買穀上倉預備賑濟及遵巡撫軍門批申借支贛州衛官軍月糧等項支過稅銀三萬八千二百九十餘兩由此觀之則地方糧賞之用歲費不貲而仰給於商稅獨重前

項商稅所入諸貨雖有而取足於鹽利獨多及查得近為緊急賊情事該兵部題奉 欽依轉行議取停當具由呈報該本道會同分守守備衙門議得賊首謝志珊有名人寨三十餘處擁衆數萬盤據三省窮克極惡神怒人怨已經呈詳轉達奏 聞動調三省官兵會剿去後及議得本省動調官兵以三萬為率半年為期糧餉等費約用數萬查得贛州府庫收貯前項稅銀除支用外止餘二千九百餘兩又是節催起解赴部之數續收銀兩止有一千六百餘兩但恐不日 命下尅期進剿軍行糧食所當預處及查得



廣東所奏前項鹽法准行南贛二府販賣果係一時  
權宜不係洪武年間舊例合無查先年總制都御  
史陳金便宜事例一面行令前商許於袁臨吉三府  
販賣所收銀兩少爲助給一面別行議處以備軍餉  
庶使有備無患不致臨期缺乏候事少寧另行具題  
禁止庶臨袁吉三府居民無乏鹽之苦南贛二府軍  
門得軍餉之利而閔津把截去處免阻隔意外之變  
誠爲一舉而二得矣等因已經備由呈奉巡撫都御  
史孫燧批看得所議鹽稅既不重累商人抑且有裨  
軍餉輿情允協事體頗宜但其至贛州府十取其一

袁臨等府十而取二似乎過重仰行再加詳議斟酌  
中回報依奉訪得商民販鹽下至三府發賣者倍  
其利既許越境販賣乃其心悅誠服並無稅重之  
辭又經呈詳奉批看得所議鹽稅事情商賈疏通軍  
餉有賴一舉兩得合遵照欽奉勅諭便宜處置事  
理仰行各道并該府縣遵奉仍禁革奸徒不許乘機  
作弊因而瞞官射利擾害地方具由繳申今照本院  
撫臨理合再行呈請照詳等因據呈到臣看得贛南  
二府閩廣猴襟盜賊淵藪即今具題夾攻不日且將  
命下糧餉之費委果缺乏計無所措必須仰給他省

但聞廣東以府江之師庫藏漸竭湖廣以偏橋之討稱貸既多亦皆自給不贍恐無羨餘可推若不請發內帑未免重科貧民然內帑以營建方新力或不逮貧民則窮困已極勢難復征及照前項鹽稅商人既已心服公私又皆兩便庶亦所謂不加賦而財足不擾民而事辦臣除遵照勅諭徑自區畫事理批行該道暫且照議施行候地方平定之日將抽過稅銀支用過數目另行具奏抽分事宜照例仍舊停止外緣係地方事理為此具本題 知

陽明先生別錄卷之一

河東重刻陽明先生別錄卷之二

十二冊

奏疏二

議夾剿兵糧疏

正德十二年七月初五日

准兵部咨該本部題職方清吏司案呈奉本部送兵科抄出巡撫湖廣地方兼贊理軍務都察院右副都御史秦金題稱會同巡按御史王度督同都布按三司掌印署都指揮僉事文恭左布政使周秀鳳副使憚巍等議照湖廣郴桂等處所屬地方與廣東樂昌江西上猶等處縣徃賊密邇聯絡彼處有名賊首龔福全高仲仁李斌龐文亮藍友貴等素恃巢穴險固

陽明公集卷之十一  
聚衆行劫先年用兵征剿各賊漏殄未除遂致禍延  
今日臣等仰體 皇上好生之心設法撫處冀圖靖  
安以成止戈之武柰犬羊之性變詐不同豺狼之心  
貪噬無厭陽雖聽招陰實肆毒今乃攻打縣堡虜官  
殺人窮兇極惡神人共憤雖經各官兵擒斬數輩稍  
懼歸巢緣其種類繁多出沒尚未可料若非三省合  
兵大彰 天討惡孽終不殄除疆宇何由寧謐所據  
各官會呈乞要大舉臣等再三籌議非敢輕啓兵端  
但審時度勢誠有不容已者况彼巢峒既多賊黨亦  
與東追西竄此出彼藏必須調發本省土漢官軍民

兵殺手人等共三萬員名分立哨道刻期進剿其兩  
廣南贛仍須各調官軍狼兵把截夾攻協濟大事臣  
等計算兵糧重大區處艱難抑且本省兵荒相繼財  
力匱乏前項合用錢糧預須計處今將應調土漢官  
軍數目供給糧餉事宜及戰攻方畧開坐具奏該本  
部覆稱閩外兵權貴在專委征伐事宜切忌遙制今  
榔柱徃賊爲害日熾既該湖廣鎮巡三司官會議兵  
不可已要行剋期進剿 朝廷若復猶豫不決徃返  
會議必致誤事但七月進兵天氣尚炎况今五月將  
中三省約會期限太迫再請 勅兩廣總督等官左

陽明先生集別錄 卷之二  
都御史陳金等及請 勅巡撫南贛左僉都御史王  
守仁各照議定事理欽遵會合行事不許違期失誤  
及改擬九月中取齊進兵庶三省路遠不誤約會本  
年五月十一日少保兼 太子太保本部尚書王瓊  
等具題奉 欽依備咨到臣除欽遵外卷查先據江  
西嶺北道副使楊璋及湖廣榔桂兵備副使陳璧并  
廣東韶州府各呈申前事臣叅看得前賊惡貫已盈  
神怒人怨 天討在所必加但近年以來江西有桃  
源之役瘡痍甫起福建有汀漳之寇軍旅未旋府江  
之師方集於兩廣偏橋之討未息於湖湘若復繼以

大兵惟恐民不堪命合無申明賞罰容臣等徐爲之  
圖惟復約會三省並舉夾攻已經開陳兩端具本上  
請去後今准前因則巡撫湖廣右副都御史秦金所  
題夾攻事理既奉有 成命矣臣謹將南贛二府議  
處兵糧事宜開坐緣係地方緊急賊情事理爲此具  
本請 旨

計開

一南安府所屬大庾南康上猶三縣各有賊巢聯  
絡盤據有衆數千西接湖廣桂陽等縣南接廣東  
韶州府樂昌等縣三省夾攻必須湖廣自桂陽桂

陽明集別錄 卷之二 三  
東等處進廣東自樂昌縣進在南安者必湏三縣  
地方並進贛州府所屬惟龍南縣賊巢與廣東惠  
州府龍川縣泃頭接壤泃頭係大賊池大鬚等巢  
穴有衆數千比之他賊勢尤猖獗前此二次夾攻  
俱被漏網龍南雖有賊徒數夥除之稍易但其倚  
藉泃頭兵力以爲聲援攻之則奔入泃頭兵退則  
復出爲害必湏廣東兵自龍川進贛州兵自龍南  
進庶可使無奔潰

一上猶去龍南幾四百里兩處進兵必湏一時並  
舉庶無驚潰之患大約計之亦湏川兵一萬二千  
名今擬調南康上猶二縣機兵打手一千二百名  
大庾縣機兵打手一千二百名贛州府所屬除石  
城縣外寧都信豐二縣機兵打手各一千名其餘  
七縣機兵打手三千名龍泉縣機兵打手一千名  
安遠縣招安義民葉芳老人梅南春等龍南縣招  
安新民王受謝鉞等兵共二千名汀州府上杭縣  
打手一千名潮州府程鄉縣打手一千名共轄一  
萬二千之數但廣湖兩省之兵皆狼土精悍賊所  
素畏勢必偏奔江西江西之兵最爲怯懦望賊而  
潰乃其素習今所擬調皆新習未練若使嚴以軍

陽明集別錄 卷之二  
法處治庶幾人心齊一事功可成

一兵一萬二千餘名每名日給米三升一日該米三百七十餘石間日折支銀一分五釐一日該銀一百八十餘兩以六箇月為率約用米三萬三千餘石用銀二萬餘兩領哨統兵旗牌等官并使客合用廩給及賞功犒勞牛酒銀牌花紅魚鹽火藥等費約用銀二萬餘兩通前二項約共用銀五萬兩二府商稅銀兩集兵以來日有所費見存銀止有四千餘兩二府并贛縣大庾南康上猶四縣積穀約計有七八萬石但貯積年久恐春米不及其

數見在前銀不足支用就欲別項區處但恐緩不及事查得江西布政司并各府縣別無蓄積止有該解南京折糧銀兩貯庫未解并一應紙米贓罰銀兩合無行巡撫江西都御史孫燧轉行布政司并行各府照數借給應用候事寧之日或將以後抽掣商稅或關中鹽引另為計處奏請補還庶克有濟

一合用本省巡按御史隨軍紀功管理錢糧及統兵領哨官員除本省三司分守分巡兵備守備并南贛二府官員臨時定委外訪得九江府知府汪

陝西通志卷之三  
五  
潁吉安府知府伍文定汀州府知府唐淳惠州府  
知府陳祥俱各才識練達程鄉縣知縣張戩撫州  
府東鄉縣知縣黃堂建昌府新城縣知縣黃文鸞  
袁州府萍鄉縣知縣高桂吉安府龍泉縣知縣陳  
允諧俱有才名俱各堪以領兵候 命下之日聽  
臣等取用臣等竊照師期已迫自今七月上旬至  
九月中旬僅餘兩月中間合用前項錢糧器仗及  
擬調兵快應委官員之類悉皆百未有措又事干  
各省道途相去近者半月遠者月餘萬一各官之  
中違抗推托不肯遵依約束臨期誤事罪將安歸

乞照湖廣巡撫都御史秦金所奏該部題准事理  
各官之中敢有抗違失誤者許臣等即以軍法從  
事庶幾警懼事可易集

南贛擒斬功次疏

十二年七月初五日

據江西按察司整飭兵備帶管分巡嶺北道副使楊  
璋呈據統兵等官南安府知府季敦呈解生擒大賊  
首一名陳曰能從賊林杲等二十七名斬獲首級十  
六顆俘獲賊屬男女十三口及馬牛等物并開稱搗  
過禾沙坑船坑石圳上龍狐狸朱雀黃石等賊巢七  
處燒死賊徒不計其數并房屋禾倉三百餘間南康

縣縣丞舒富呈解生擒大賊首一名鍾明貴從賊曾  
能志等二十一名斬獲首級四十五顆殺死未取首  
賊一百一十七名俘獲賊屬男女一十六名口及牛  
馬騾等物并開稱搗過石路坑白水峒杞州坑旱坑  
茶潭竹壩皮袍樟木坑等賊巢八處燒死賊徒三百  
四十六名并燒毀房屋禾倉四百七十餘間贛縣義  
官蕭庾呈解生擒大賊首一名唐洪從賊蒲仁祥等  
六名斬獲首級并射死賊從一百三十八名燒毀賊  
巢房屋禾倉一百二十間及俘獲牛羊器械等物并  
開稱搗過長龍鷄湖楊梅新溪等處賊巢四處各緣

由到道隨據統兵官員并鄉尊人等各呈稱自本年  
正月蒙本院撫臨以來募兵練卒各賊探知消息將  
家屬婦女什物俱各寄屯山寨林木茂密之處其各  
精壯賊徒晝則下山耕作夜則各遯山寨依奉本院  
方略於六月二十日子時各哨尅期進剿每巢止有  
二三十人或四五十人看守巢穴見兵舉火奮擊俱  
各驚潰間有射傷藥弩即時身死墜於深巖及據縣  
丞舒富義官蕭庾各回呈止有上猶縣白水峒石路  
坑二巢南康縣鷄湖一巢險峻巢內賊屬頗多被兵  
四面放火攻進賊無出路燒死數多天明看視止存



骸骨頭面燒毀莫辨以此難取首級等因案照先為  
緊急賊情事據上猶縣申稱四月間被峯巢賊徒不  
時虜掠耕牛人口請兵追剿鄉民稍得蔣挿今早穀  
將登又聞各巢脩整戰具出劫乞為防遏庶得收割  
聊生等因并據縣丞舒富及南安府呈大庾縣申同  
前事該本道查得上猶縣隣近巢穴則有旱坑茶潭  
杞州坑樟木坑石路坑白水峒竹壩川劫陰水潭等  
巢南康縣則有長龍鷄湖楊梅新溪等巢大庾縣則  
有狐狸坑船坑禾沙坑石圳上龍朱雀黃石坑等巢  
多則三五百名少則七八十名合無將本院選集之

兵委官統領分投剿遏等因已經呈奉本院批看得  
各賊名號日漸僭擬惡毒日加縱肆若果遂其奸謀  
得以乘虛入廣其為患害關係匪輕除密行南韶等  
府分兵防截外仰該道即便部勒諸軍定哨分委仍  
密召各巢附近被害知因之人堪為鄉導者前來分  
引各兵出城之時不得張揚今正當換班之月就令  
俱以下班為名晝伏夜行尅期各至分地掩賊不備  
同時舉事分領各官務要嚴密奮勇竭忠以副委託  
如或推奸誤事及軍士之中敢有後期退縮者悉以  
軍法從事决不輕貸該道亦要親帥重兵隨後繼進

陽明全集別錄 卷之二  
密屯賊巢要害處所相機接應以防不測一應機宜務須慎密周悉仍要嚴緝各兵所獲真正賊徒不許濫加良善等因遵奉統領各兵刻期進剿及加謹防遏今據復...因通查得各哨共計生擒大賊首三名首從賊徒五十四名斬獲首級六十八顆殺死射死賊徒二百四十餘名燒死賊徒二百餘名搗過巢穴一十九處燒燬房屋禾倉八百九十餘間俘獲賊屬男女二十九名口水黃牛馬騾羊一百四十四頭匹隻所據各該領兵等官所報擒斬之賊數固不多而巢穴已空無一樓身積聚已焚無可仰給就使屯

集橫水桶岡大巢將來人多食少大舉夾攻爲力已易等因轉呈到臣查先據副使楊璋呈稱據南安府并上猶等縣及縣丞舒富各呈申訪得大賊首謝志珊號征南王糾率大賊首鍾明貴蕭規模陳曰能唐洪劉允昌等約會樂昌高快馬等大脩戰具并造呂公車欲先將南康縣打破聞知廣東官兵盡調征勦府江就行乘虛入廣等因已經批仰該道部勒諸軍酌量賊巢強弱派定哨分選委謀勇屬官統兵密召知因鄉導引領晝伏夜行刻定於六月二十日子時入各賊巢同時舉火併力奮擊務使噍類無遺去

後今據前因覆勘得前項賊巢委果蕩平殆盡蓄積  
委果焚燬無遺獲功解報雖少殺傷燒死實多倡熾  
之勢少摧不軌之謀暫阻居民得以秋獲地方亦爲  
一寧此皆遵依兵部申明律例事理仰仗 天威官  
兵用命之所致非臣之謀所能及也臣惟南贛之兵  
素不練養見賊而奔則其常態今各官乃能夜入賊  
巢奮勇追擊在他所未爲可異之功於南贛則實創  
見之事及照副使楊璋區畫贊理比於各官勞勩尤  
多今夾攻在邇伏乞 皇上特加勸賞以作興勇敢  
之風庶幾日後大舉臣等得以激勵人心除將獲功

人員量加犒賞生擒賊徒監候審決首級梟示俘獲  
賊屬領養牛馬賞兵有功人員查審的確造冊奏繳  
外緣係斬獲功次事理爲此具本題 知

議夾勦方略疏

十二年九月十五日

據江西嶺北道副使楊璋呈奉臣案驗准兵部咨該  
巡撫湖廣都御史秦金題爲緊急賊情事備行計處  
兵糧約會三省將上猶縣等處賊巢尅期九月中進  
勦等因遵依隨將本道兵糧事宜計呈本院轉達奏  
聞定奪外隨據南安府上猶大庾等縣申稱各縣鄉  
民早穀將登各巢葦賊修整戰具要行出劫并據南

陽明全集卷之二  
康縣縣丞舒富呈訪得大賊首謝志珊號征南王糾率桶岡等巢賊首鍾明貴等約會廣東大賊首高快馬等大修戰具并呂公車欲要先將南康縣打破聞知廣東官兵盡調府江就行乘虛入廣沅劫乞要早為撲勦等因已經呈蒙本院密授方略行委知府季敷縣丞舒富等領兵分勦共生擒大賊首陳曰能等三名首從賊徒五十四名斬獲賊首級六十八顆殺死射死賊徒二百四十餘名燒死賊徒二百餘名搗過巢穴一十九處燒燬房屋禾倉八百九十餘間俘獲賊屬二十九名口水黃牛馬羊騾一百四十四頭

匹通經呈報又蒙本院慮賊必將乘間復出行委知府季敷指揮來春等統兵屯南安指揮姚璽縣丞舒富統兵屯上猶指揮謝昶千戶林節統兵屯南康各於要害去處往來防勦至七月二十五日賊首謝志珊果復統眾一千五百餘徒攻打南安府城各官督兵迎敵生擒賊犯楊鑾等七名斬獲首級四十五顆賊眾大敗而去八月二十五日賊首謝志珊又統領二千餘徒復來攻打南安府城各官督兵迎敵生擒賊犯龍正等四十二名斬獲首級一百五十七顆賊又大敗而去即今賊勢少挫若乘此機會直搗其巢

陽明全集卷之二  
十一  
旬月之間可期掃蕩但聞湖廣之兵既已齊集而廣東因府江班師未久復調狼兵未有定期謹按地圖江西之南安有上猶大庾桶岡等處賊巢與湖廣桂東桂陽接境夾攻之舉止該江西與湖廣會合而廣東止于仁化縣要害把截夾攻不與焉贛州之龍南有泃頭賊巢與廣東龍川接境夾攻之舉止該江西與廣東會合而湖廣不與焉廣東樂昌乳源賊巢與湖廣宜章縣接境惠州賊巢與湖廣臨武縣接境仁化縣賊巢與湖廣桂陽縣接境夾攻之舉止該湖廣廣東二省會合而江西止於大庾縣要害把截夾攻

不與焉名雖三省大舉其實自有先後舉動次第不相妨礙若不此之察必欲通待三省之兵齊集然後進勦則老師廢財為害匪細合將前項事宜約會三省以次漸舉庶兵力不竭糧餉可省等因據呈到臣看得三省夾攻必須彼此尅期定日同時並舉斯乃事體之常然兵無定勢謀貴從時苟勢或因地而異便則事宜量方以乘機三省賊巢連絡千里雖聲勢相因而其間亦自有種類之分界限之隔利則爭趨患不相顧乃其性習誠使三省之兵皆已齊備會約並進夫豈不善但今廣東狼兵方自府江班師而歸

陽明集卷之二  
卷之二  
十一  
欲復調集恐非旬月所能兩省之兵既集又頓而不  
進賊必驚疑愈生其奸悍者奔突黠者潛逃老師費  
財意外之虞乘間而起雖有智者難善其後誠使先  
合湖廣江西之兵併力而舉上猶諸賊逮事之畢廣  
東之兵亦且集矣則又合湖廣廣東之兵併力而舉  
樂昌諸處逮事之畢江西之兵又得以少息矣則又  
合廣東江西之兵併力而舉龍川方其併力於上猶  
則姑遣人佯撫樂昌諸賊以安其心彼見廣東既未  
有備而湖廣之兵又不及已苟幸旦夕之生必不敢  
越界以援上猶及夫上猶既舉而湖廣移兵以合廣

東則樂昌諸賊其勢已孤二省兵力益專其舉之益  
易當是之時龍川賊巢相去遼絕自以為風馬牛不  
相及彼見江西之兵又撤意必不疑班師之日出其  
不意回軍合擊茂有不濟者矣臣竊以為因地之宜  
先後合擊之便除臣遵照兵部咨來題奉 欽依會  
兵征勦亦聽隨宜會議施行事理已將前項事宜移  
咨廣東湖廣總督巡撫等官知會一面相機行事外  
緣係地方緊急賊情事理為此具本題 知

換

勅謝

恩疏

十二年九月十五日

近准兵部咨為申明賞罰以勵人心事該臣奏該本

部覆題節奏 聖旨是王守仁着提督南贛汀漳等處軍務換勅與他欽此備咨到臣本年九月十一日節該欽奉 勅諭江西南安贛州地方與福建汀漳二府廣東南韶潮惠四府及湖廣郴州桂陽縣壤地相接山嶺相連其間盜賊不時生發東追則西竄南捕則北奔蓋因地分各省事無統屬彼此推調難爲處置先年嘗設有都御史一員巡撫前項地方就令督剿盜賊但責任不專類多因循苟且不能申明賞罰以勵人心致令盜賊滋多地方受禍今因所奏及該部覆奏事理特改命爾提督軍務撫安軍民修理

城池禁革奸弊一應軍馬錢糧事宜俱聽便宜區畫以足軍餉但有盜賊生發即便設法調兵剿殺不許踵襲舊弊招撫蒙蔽重爲民患其管領兵快人等官員不問文職武職若在軍前違期并逗遛退縮者俱聽軍法從事生擒盜賊鞫問明白亦聽就行斬首示衆斬獲賊級行令各該兵備守巡官即時紀驗明白備行江西按察司造冊奏繳查照陞賞激勸欽此俱欽遵外竊念臣以凡庸繆膺重寄思逃罪責深求禍源始知盜賊之日熾由於招撫之太濫招撫之太濫由於兵力之不足兵力之不足由於賞罰之不明輒

陽明全集卷之二 十四  
敢忘其僭妄為 陛下陳其梗槩其實言不量力  
請非其分方虞戮辱之及 陛下特採該部之議不  
惟不加咎謫而又悉與施行不惟悉與施行而又隆  
以 新命是蓋曲從試可之請不忍以人廢言也  
勅諭宣布之日百姓填衢塞道悚然改觀易慮以為  
聖天子明見萬里動察幽微占群策之畢舉知國議  
之有人莫不警懼振發強息其暴偽息其奸怯者思  
奮而勇後者思效而前三軍之氣自倍群盜之謀自  
阻所謂舞干格苗運於廟堂之上而震乎蠻貊之中  
者也夫過其言而不酬有志者之所恥也 冒寵榮而

不顧自好者不為也臣固譴劣亦寧草木無知不思  
鞭策以報 知遇雖其才力有所難強而螻蟻之誠  
決能自盡雖於利鈍不可逆睹而狐兔之穴斷期掃  
平臣不勝感 恩激切之至

交收旗牌疏 二十二年九月二十五日

准工部咨該本部題稱看得兵部咨開都御史王守  
仁奉 勅提督軍務應合照例給與旗牌以振軍威  
一節既查有例又奉 欽依合無於本部收有內給  
與旗牌八面副就令原來百戶尹麟前去交與本官  
督軍應用務加愛惜不得輕意損壞候到先將收領



過日期號數徑自奏報查考等因具題奉 聖旨是  
欽此欽遵備咨到臣隨於十年九月十六日據百戶  
尹麟領齋令旗令牌八副面前來除照數收領調度  
軍馬應用務加愛惜不敢輕意損壞外緣係交收旗  
牌事理爲此今將收領過日期緣由并號數開坐具  
本題 知

議南贛商稅疏

十二年九月二十五日

據江西按察司分巡嶺北道兵備副使楊璋呈奉巡  
撫江西地方右副都御史孫燧案驗備行各道兵備  
等官有地方重大軍務益於政體便於軍民果係應

議事件即便條列呈報以憑施行等因隨據南安府  
呈繳本年春季分折梅亭抽分商稅循環文簿看得  
該府造報冊內某日共抽稅銀若干不見開有某商  
人某貨若干抽銀若干中間不無任意抽報情弊及  
看得一季總數倍少于前原其所自蓋因抽分官員  
止是典史倉官義民等項不惜名節惟嗜貪污兼以  
官職卑微人心玩視以致過往客商或假稱權要而  
挾放或買求官吏而帶過及被店牙通同客商買求  
書筭以多作少以有作無奸弊百端卷查前項抽分  
創于巡撫都御史金澤一則甦大庾過山之夫一則

濟南贛軍餉之用題奉 欽依遵行年久及查贛州  
龜角尾設立抽分廠建白于總制都御史陳金自正  
德六年十一月二十七日起至九年七月終止共抽  
過商稅銀四萬二千六百八十六兩六錢三分七毫  
五忽本省大帽山姚源華林盜賊四起大舉夾攻一  
應軍餉俱仰給于此並未奏動 內帑之積亦未科  
派小民之財以此而觀則商稅之有益地方多矣緣  
贛州之稅正德十一年該給事中黃重奏稱廣貨自  
南雄經南安折梅亭已兩稅矣贛州之稅不無重復  
已經勘明停止贛河之稅近復大舉夾攻軍餉仰給

全在折梅亭之稅今所入如此非惟軍餉無益實惟  
奸宄是資隨會同分守左叅議黃宏議照合將南安  
之稅移於龜角尾抽分既有分巡道之監臨又有巡  
撫之統馭訪察數多奸弊自少其大庾縣顧夫銀兩  
合令該縣每季具印信領狀赴道批行贛州府支領  
支盡查筭准令復支如此非惟大庾過嶺之夫不缺  
而軍餉之用大增合就會案呈詳等因據呈到臣看  
得南贛二府商稅皆因給軍餉裕民力而設折梅亭  
之稅名雖為夫役而實以給軍餉龜角尾之稅事雖  
重軍餉而亦以裕民力兩稅雖若二事其實殊途同

歸但折梅亭雖已抽分而龜角尾不復致詰未免有  
脫漏之弊若折梅亭既已抽分而龜角尾又復致詰  
未免有留滯之擾况監司既遠胥猾得以恣其侵漁  
頭緒既多彼此得以容其奸隙若革去折梅亭之抽  
分而總稅於龜角尾則事體歸一奸弊自消非但有  
資軍餉抑且便利客商蓋分合雖異而於商稅事體  
無改纖毫轉移之間而於民商利害相去倍蓰除臣  
欽遵節奉 勅諭一應軍馬錢糧事宜俱聽便宜區  
畫事理將副使楊璋等所議行令該府一面查照施  
行外緣係地方事理為此具本題 知

陸賞謝

恩疏

正德十二年  
十月初一日

節該欽奉 勅得爾奏該福建兵備僉事等官胡璉  
等統領軍兵各分哨路於今年正月十八等日先後  
攻破長富村象湖山可塘洞等處穴擒斬首從賊級  
一千四百二十九名顆及該廣東兵備僉事等官顧  
應祥等統領軍兵分哨並進於今年正月二十四等  
日克破古村箭灌水竹等寨斬賊級一千二百七十  
二名顆各俘獲賊屬奪回人口頭畜器械等數多賊  
害既除良民安堵蓋由爾申嚴號令處置有方以致  
各該官員奉行成算有此成功捷奏來聞朕心嘉悅

除有功官軍民快人等待查勘至日陞賞外陞爾俸一級賞銀二十兩紵絲二表裏仍降勅獎勵爾其益竭心力大展才猷脩明武備多方計畫務使四省交界之區數年嘯聚之黨撫勦盡絕地方永獲安靖斯稱朕委任之意毋或徂于此捷遽生怠玩致有他虞欽此 欽遵臣惟賞及微勞則有功者益勸罰行親暱則有罪者益警近者聞廣之師幸而成功其方畧議於該部成筭出於朝廷用命存於諸將戮力因於士卒臣不過申嚴號令敷布督促之而已曾有何功而乃冒蒙 褒賞增其祿秩錫以金幣臣實不

勝慚汗惶恐之至然臣嘗有申明賞罰之奏矣嘗有願 陛下俯從推重之典以作敢勇之風之請矣臣之微勞懼不免於罪而 陛下曲從該部之議特賜優渥之恩者所謂賞及微勞將以激勸有功也昔人有云死馬且買之千里馬將至矣臣敢畏避冒賞之戮苟為遜讓以仰辜 陛下激勵作興之盛心乎受 命之餘感懼交集誓竭犬馬之力以効涓埃之報臣不勝受 恩感激之至

橫水桶岡捷音疏

十二年閏十二月初二日

據江西布按二司巡守嶺北道兵備副使楊璋左叅

議黃宏會呈據一哨統兵贛州府知府邢珣呈督同興國縣典史區澄等官兵於十月十二等日攻破磨刀坑等巢十一月初一等日攻破桶岡洞等巢二十三日會兵擊賊于上新地寨兵十四處共擒斬大賊首雷鳴聰藍文亨梁伯安等六名顆賊從王禮生等二百四十一名顆俘獲賊屬弁奪回被虜男婦二百五十七名口燒毀賊巢房屋一百七十七間及奪馬牛賊仗等項二哨統兵福建汀州府知府唐淳呈督同上杭縣縣丞陳秉等官兵於十月十二等日攻破左溪等巢十一月初一等日攻破十八磊等巢共十

二處共擒斬大賊首藍天鳳藍八蘇景祥等四名顆賊從廖歐保等二百六十四名顆俘獲賊屬弁奪回被虜男婦五百四十四名口燒毀賊巢房屋七百一十二間及奪獲馬牛器械贓銀等項三哨統兵南安府知府季敦呈督同同知朱憲推官徐文英等官兵於十月十二等日攻破穩下等巢十二月初三日擊賊于朱雀坑等巢共八處生擒大賊首高文輝何文秀等五名擒斬賊從楊禮等三百六十一名顆俘獲賊屬弁奪回被虜男婦一百七十一名口燒毀賊巢房屋五百七十八間奪獲牛馬賊仗等物及先於七

月二十五等日二次被賊擁衆攻打本府城池統領本營官兵會同指揮來春馮翔與賊對敵本職下官兵舍人共擒斬賊從龍正等一百三名顆來春下官兵擒斬賊從王伯崇等二十五名顆馮翔下官兵擒斬賊從劉保等一百三十五名顆四哨統兵江西都司都指揮僉事許清開稱督領千戶林節等官兵於十月十二等日攻破鷄湖等巢兵九處共擒斬大賊首唐洪劉亢昌葉志亮譚祐李斌等共一十名顆賊從王志成等一百四十六名顆俘獲賊屬并奪回被虜男婦一百三名口燒毀賊巢房屋二百間及奪獲

牛馬賊仗等物五哨統兵守備南贛二府地方以都指揮體統行事指揮使邾文呈督領安遠縣義官唐廷華官兵於十月十二等日攻破御子寨等巢二十三日會兵擊賊于上新地寨斬獲賊首藍文詔等三名顆擒斬賊從許受仔等一百六十六名顆俘獲賊屬并奪回被虜男婦九十八名口燒毀賊巢房屋四百一十二間及奪獲牛馬器械等項六哨統兵贛州衛指揮余恩呈統領龍南縣新民王受等兵於十月十二等日攻破長流坑等巢共五處擒斬大賊首陳貴誠薛文高劉必深三名顆賊從郭彥秀等一百七

陽明集卷之二  
十七名顆俘獲賊屬并奪回被虜男婦九十九名口  
燒毀賊巢房屋五百一十七間及奪獲馬驢器械賊  
銀等物七哨統兵寧都縣知縣王天與呈督同典史  
梁儀等官兵於十月十二等日攻破樟木坑等巢共  
五處擒斬大賊首鄧崇泰王孔洪等八名顆擒斬賊  
從陳榮漢等一百三十九名顆俘獲賊屬并奪回被  
虜男婦二百七十五名口燒毀賊巢房屋一百六間  
及奪獲牛馬贓物等項八哨統兵南康縣縣丞舒富  
呈統領上猶縣義官胡述等兵於十月十二等日攻  
破箬坑等巢共五處擒斬賊從康仲榮等四百一十

九名顆俘獲賊屬并奪回被虜男婦一百八十三名  
口燒毀賊巢房屋九百九十三間及奪獲牛馬贓銀  
等項及先於九月二十一等日大賊首謝志田等攻  
打白面寨隨督發寨長廖惟道等擒斬首從賊徒謝  
志田等三十五名顆九哨統兵廣東潮州府程鄉縣  
知縣張戩呈統領本縣新民等兵於十月二十四日  
等攻破杞州坑等巢十一月初一等日攻破西山界  
桶岡等巢共九處擒斬大賊首蕭貴富鍾得昌等六  
名顆賊從何景聰等二百五十七名顆俘獲賊屬并  
奪回被虜男婦一百五十七名口及奪獲牛馬器械

陽明集別錄 卷之二 三十一  
賊銀等物十哨統兵吉安府知府伍文定呈統領廬  
陵縣等官兵劉顯等於十月二十四日攻破寨下  
等巢十一月初一等日攻破上池等巢二十日擊賊  
於穩下等寨共十二處擒斬大賊首謝志珊葉三等  
二十名顆賊從王福兒等二百三十八名顆俘獲賊  
屬弁奪回被虜男婦二百八十四名口燒毀賊巢房  
屋一百三十三間及奪獲賊仗等物中營隨征叅隨  
等官推官危壽指揮謝昶等各呈蒙提督軍門親統  
各職等官兵於十月十二日攻破長龍橫水大巢  
及菴背等巢共七處生擒大賊首蕭貴模等一十四

名擒斬賊從蕭容等四百六十五名顆俘獲賊屬弁  
奪回被虜男婦二百四十八名口燒毀賊巢房屋二  
百二間及奪獲牛馬金銀賊仗等項各呈報到道查  
得先為地方緊急賊情事節奉提督軍門案驗備仰  
本道計處兵糧約會三省官兵將上猶等處賊巢剋  
期進勦奏請定奪外本年六月初五日據大庾上猶  
等縣申并據南康縣縣丞舒富呈稱大賊首謝志珊  
號征南王糾率桶岡等巢賊首鍾明貴等約會廣東  
大賊首高快馬等大修戰具并造呂公車欲要先將  
南康縣打破就行乘虛入廣乞早為撲捕等因備呈



知府李敷等分兵剿捕獲功呈報奏聞  
 經本院行委知府李敷指揮來春姚璽謝昶馮  
 翔縣丞舒富千戶林節各於要害防遏擒斬功次俱  
 發仰本道紀驗解送本院彙示外隨該本道會同分  
 守叅議黃宏議照江西地方惟桶岡一處該與湖廣  
 約會夾攻龍川一縣該與廣東約會夾攻其餘三縣  
 腹心之賊不時奔衝難以止遏合無以次剿捕等因  
 具呈本院移文廣東湖廣鎮巡衙門約會以次攻勦  
 間隨奉本院分定哨道指授方畧將知府邢珣等刻  
 期進剿備仰各道不妨職事照舊軍前紀驗贖畫等

因依奉催督各營官兵進攻去後今呈前因除將擒  
 斬賊徒首級俱類送巡按衙門會審紀驗明白生擒  
 仍解提督軍門處決并賊級照例彙示被虜人口給  
 親完聚賊屬男女并牛馬騾變賣銀兩收候賞功支  
 用器械賊物俱發贛縣貯庫外職等議照上猶等縣  
 橫水等巢大賊首謝志珊謝志田謝志富謝志海蕭  
 貴模蕭貴富徐華譚曰志雷俊臣桶岡大賊首藍天  
 鳳藍八蘇藍文昭胡觀雷鳴聰藍文亨鷄湖大賊首  
 唐洪新溪大賊首劉允昌楊梅大賊首葉志亮左溪  
 大賊首薛文高高誦馮祥朱雀坑大賊首何文秀下

關大賊首蘇景祥義安大賊首高文輝密溪大賊首  
陳玉瑄康永三絲茅壩大賊首唐曰富劉必深長河  
壩大賊首蔡積富葉三梅伏坑大賊首陳貴誠鼈坑  
大賊首藍通海赤坑大賊首譚曰榮雙壩大賊首譚  
祐李斌等冥頑兇毒恃險為惡僭擬王號偽稱總兵  
聚集黨類數千肆行流毒三省攻圍南安南康府縣  
城池殺害千戶主簿等官流劫湖廣桂陽鄱縣宜章  
吉安府龍泉萬安泰和永新等縣良民子女被其奴  
戮房產倉廩被其焚燒道路田土被其阻荒占奪者  
以千萬頃賦稅屯糧負累軍民陪納者以千萬石其

大賊首謝志珊藍天鳳各又自稱盤皇子孫收有  
流寶印畫像蠱惑群賊悉歸約束即其妖狐酷鼠之  
謀固知決無所就而原其封豕長蛇之心實已有不  
可言比之姚源之王浩八華林之胡雪二東鄉之徐  
仰四建昌之徐九齡均為賊首而奸雄實倍之今則  
渠魁授首巢穴蕩平擒斬既多俘獲亦盡數十年之  
禍害已除三省之冤憤頓釋悉皆仰仗 朝廷憐念  
地方之荼毒大興征討之 王師弁提督軍門指授  
成筭號令嚴明親臨督陣身先士卒以致各哨官兵  
用命爭先捐軀赴敵獲臻是捷擬合會案呈詳施行

陽明集別錄 卷之二 二十五  
等因據呈到臣卷查先准兵部咨為申明賞罰以勵  
人心事該本部覆議請 勅南贛等處都御史假以  
提督軍務名目給與旗牌應用以振軍威一應軍馬  
錢糧事宜徑自便宜區畫文職五品以下武職三品  
以下徑自拏問發落如遇盜賊入境即便調兵勦殺  
不許踵襲舊弊招撫重為民患所部官軍若在軍前  
違期逗遛退縮俱聽以軍法從事題奉 聖旨是王  
守仁着提督南贛汀漳等處軍務換勅與他其餘事  
宜各依擬行欽此及為地方緊急賊情事准兵部咨  
看得所奏攻治賊盜二說合無行文交與都御史王

守仁悉依前項申明賞罰事理便宜行事期於成功  
不限以時等因題奉 聖旨是這申明賞罰事宜還  
行與王守仁知道欽此又准兵部咨該巡撫湖廣都  
御史秦金題該本部覆題看得郴桂等處與廣東江  
西所轄徭峒密邇聯絡若非三省會兵夾攻賊必遁  
散合無請 勅兩廣并南贛總督巡撫等官會同行  
事剋期進兵等因節奉 聖旨是都依擬行欽此又  
該巡按江西監察御史屠僑奏要會同湖廣江西撫  
鎮等官各量起兵約會剋期夾勦又該本部覆題奉  
聖旨是這南贛地方賊情只照依恁部裏原擬事宜

陽明先生集卷之二  
着都御史王守仁自行量調官軍設法剿捕如有該  
與江西兩廣巡撫總督等官會兵征剿的聽隨宜會  
議施行欽此續准兵部咨該臣題開計處南贛二府  
兵糧事宜及合用本省巡按御史紀功緣由該本部  
覆題奉 聖旨是都依擬行欽此俱 欽遵陸續備  
咨到臣俱經行江西廣東湖廣各道兵備守巡等官  
一體欽遵調取官軍兵快剋期夾攻及咨巡撫江西  
都御史孫燧并行巡按御史屠僑各查照外續據領  
兵縣丞舒富等呈稱各峯賊首聞知湖廣土兵將到  
集衆據險四出殺掠猖熾日甚乞為急處等因到臣

當將進兵機宜督同兵備副使楊璋分守叅議黃宏  
統兵知府等官邢珣等議得桶岡橫水左溪諸賊茶  
毒三省其患雖同而事勢各異以湖廣言之則桶岡  
諸巢為賊之咽喉而橫水左溪諸巢為之腹心以江  
西言之則橫水左溪諸巢為賊之腹心而桶岡諸巢  
為之羽翼今不先去橫水左溪腹心之患而欲與湖  
廣夾攻桶岡進兵兩寇之間腹背受敵勢必不利今  
議者紛紛皆以為必須先攻桶岡而湖廣剋期乃在  
十一月初一日賊見我兵未集而師期尚遠且以為  
必先桶岡勢必觀望未備今若出其不意進兵速擊

可以得志已破橫水左溪移兵而臨桶岡破竹之勢  
篋不濟矣於是臣等乃決意先攻橫水左溪密切分  
布哨道使都指揮僉事許清率兵千餘自南康縣所  
溪入知府邢珣率兵千餘自上猶縣石人坑入知縣  
王天與率兵千餘自上猶縣白面入令其皆會橫水  
使守備指揮郊文率兵千餘自大庾縣義安入知府  
唐淳率兵千餘自大庾縣聶都入知府季敦率兵千  
餘自大庾縣穩下入縣丞舒富率兵千餘自上猶縣  
金坑入令其皆會左溪知府伍文定知縣張戩候各  
齊集令其亦從上猶南康分入以遏奔衝臣亦親

率兵千餘自南康進屯至坪期直搗橫水以與諸軍  
會而使兵備副使楊璋分守叅議黃宏監督各營官  
兵往來給餉以促其後分布既定乃於十月初七日  
夜各哨齊發初九日臣兵至南康初十日進屯至坪  
使問諜四路分探皆以為諸賊不虞官兵猝進各巢  
皆鳴鑼聚衆往來呼噪奔走為分投禦敵之狀勢甚  
張皇然已於各險隘皆設有滾木礮石度此時賊已  
據險勢未可近臣兵乘夜遂進十一日小餉未至賊  
巢三十里止舍使人伐木立柵開塹設墩示以久屯  
之形夜使報効聽選官雷濟義民蕭庾分率鄉兵及

陽川全集別錄 卷之三  
樵豎善登山者四百人各與一旗齎銃砲鉤鑣使由  
間道攀崖懸壁而上分列遠近極高山頂以覘賊張  
立旗幟蕪茅為數千竈度我兵且至險則舉砲燃火  
相應十一日早臣兵進至十八面隘賊方據險迎敵  
驟聞遠近山頂砲聲如雷煙焰四起我兵復呼噪奮  
逼銃箭齊發賊皆驚潰失措以為我兵已盡入破其  
巢穴遂棄險退走臣預遣千戶陳儒高睿分率壯士  
數十緣崖上奪賊險盡發其滾木礮石我兵乘勝驟  
進呼聲震天地指揮謝和馮廷瑞兵由間道先入盡  
焚賊巢賊退無所據乃大敗奔潰遂破長龍巢破十

八面隘巢破先塢頭巢破狗脚嶺巢破菴背巢破白  
藍橫水大巢先是大賊首謝志珊蕭貴模等皆以橫  
水君衆險之中倚以為固聞官兵四進倉卒分衆扼  
險出禦甚力至是見橫水煙焰障天銃砲之聲撼搖  
山谷亦各失勢棄險走各哨官兵乘之皆奮勇力戰  
而入知府邢珣遂破磨刀坑巢破茶坑巢破茶潭巢  
知縣王天與破樟木坑巢破石王巢都指揮許清破  
鷄湖巢破新溪巢破楊梅巢俱至橫水知府唐淳破  
羊牯腦巢破上關巢破下關巢破左溪大巢守備指  
揮鄭文破御寨巢破義安巢破苦竹坑巢指揮余恩

陽明全集卷之二  
二十九  
破長流坑巢破牛角窩巢破鼈坑巢縣丞舒富破箬坑巢破赤坑巢破竹壩巢知府李敷破上西峯巢破孤狸坑巢破鉛廠巢俱至左溪守巡各官亦隨後督兵而至是日擒斬首從賊人賊級并俘獲賊屬男婦奪回被虜人口牛馬賊仗數多其餘自相蹂踐墮崖填谷而死者不可勝計當是時賊路所由入皆刊崖倒樹設阱埋簽不可行我兵晝夜涉深澗蹈叢棘遇險絕則掛繩崖樹魚貫而上猿臂而下往往失足墮深谷幸而不死經數日始能出各兵已至橫水左溪皆困甚不復能驅逐會日已暮遂令收兵屯劄次日

大霧雨咫尺不辯連數日不開乃令各營休兵享士而使鄉導數十人分探潰賊所往并未破巢穴動靜十五日得各鄉導報謂諸賊分陣預於各山絕險崖壁立有柵寨為退保之計有復合聚於未破之巢者俱不意我兵驟入未及搬運糧穀若分兵四散追擊可以盡獲臣等竊計湖廣夾攻在十一月初一期已漸迫此去桶岡尚百餘里山路嶮峻三日始能達若此中之賊圍之不克而移兵桶岡勢分備多前後顧瞻非計之得乃令各營皆分兵為奇正二哨一攻其前一襲其後冒霧速進分投急擊十六日知府邢珣

陽明集別錄 卷之二 三十一  
攻破旱坑巢寫井巢知府李敷守備指揮郊文攻破  
穩下巢李家巢十七日知府唐淳攻破絲茅壩巢十  
八日都指揮許清攻破朱雀坑巢村頭坑巢黃竹均  
巢觀音山巢十九日指揮余恩攻破梅伏坑巢石頭  
坑巢二十日知府邢珣又攻破白封龍巢芒背巢知  
縣王天與攻破黃泥坑巢大富灣巢二十二日縣丞  
舒富攻破白水洞巢本日知府伍文定知縣張戩兵  
亦至二十四日知府伍文定攻破寨下巢知縣張戩  
攻破杞州坑巢二十五日知縣張戩又破朱坑巢知  
府伍文定破楊家山巢二十六日知府李敷又破李

坑巢都指揮許清又破川均巢二十七日守備指揮  
郊文又破長河洞巢連日各擒斬首從賊人賊及并  
俘獲賊屬男婦奪回被虜人口牛馬賊仗數多是日  
各營官兵請乘勝進攻桶岡臣復議得桶岡天險四  
面青壁萬仞中盤百餘里連峯參天深林絕谷不睹  
日月中所產旱穀薯蕷之類足餉凶歲往者亦嘗夾  
攻坐困數月不能俘其一卒竟以招撫為名而罷及  
詢訪鄉導其所由入惟鎖匙龍葫蘆洞茶坑十八磊  
新地五處然皆架棧梯壘夤懸絕壁而上賊使數人  
於崖巔坐發礮石可無執兵而禦我師惟上章一路



陽明全集卷之二  
稍平然深入湖廣迂回取道半月始至湖兵既從彼  
入而我師復徃事皆非便今橫水左溪餘賊皆已奔  
入其中同難合勢為守必力善戰者其勢險其節短  
今我欲乘全勝之鋒兼三日之程長驅百餘里而爭  
利彼若拒而不前頓兵幽谷之底所謂強弩之末不  
能穿魯縞矣今若移屯近地休兵養銳振揚威聲先  
使人諭以禍福彼必懼而請服其或有不從者乘其  
猶豫襲而擊之乃可以逞乃使素與賊通戴罪義官  
李正巖醫官劉福泰釋其罪并縱所獲桶岡賊鍾景  
於二十八日夜懸壁而入期以初一日早使人於鎖

匙龍受降賊方甚恐見三人至皆喜乃集衆會議而  
橫水左溪奔入之賊果堅持不可徃復遲疑不暇為  
備臣遣縣丞舒富率數百人屯鎖匙龍促使出降而  
使知府邢珣入茶坑知府伍文定入西山界知府唐  
淳入十八磊知縣張戩入葫蘆洞皆於三十日乘夜  
各至分地遇大雨不得進初二日早冒雨疾登大賊  
首藍天鳳方就鎖匙龍聚議聞各兵已入險皆驚愕  
散亂猶驅其衆男婦千餘人據內隘絕壁隔水為陣  
以拒知府邢珣之兵渡水前擊張戩之兵衝其右伍  
文定之兵自張戩右懸崖而下遶賊傍擊賊不能支

陽川全真別錄 卷之三 三十一  
且戰且却及午兩霽各兵鼓奮而前乃敗走縣丞舒  
富知縣王天與所領兵聞前山兵已入亦從鎖匙龍  
並登各軍乘勝擒斬賊悉奔十八磊知府唐淳之兵  
復嚴陣迎賊又敗然會日晚猶扼險相持次早諸軍  
復合勢併擊大戰良久遂大敗知府邢珣破桶岡大  
巢破梅伏巢破鳥池巢知縣張戩破西山界巢鎖匙  
龍巢破黃竹坑巢知府唐淳破十八磊巢知府伍文  
定破鐵木里巢破上池巢破葫蘆洞巢知縣王天與  
破員分巢破背水坑巢縣丞舒富破太王嶺巢擒斬  
首從賊人賊級弁俘獲賊屬男婦奪回被虜人口牛

馬賊仗數多賊六勢雖敗結陣分遁者尚多是日聞  
湖廣土兵將至臣使知府邢珣屯葫蘆洞知府唐  
屯十八磊知府伍文定屯大水守備指揮郊文屯下  
新地知縣張戩屯礮頭縣丞舒富屯茶坑指揮姚璽  
知縣王天與屯板嶺而使副使楊璋巡行礮頭茶坑  
諸營監督進止以繼其糧餉又使知府季敷分屯聶  
都以防賊之南奔都指揮許清留屯橫水指揮余恩  
留屯左溪以備腹心遺漏之賊而使叅議黃宏留劄  
南安給糧餉以為聶都之繼臣亦躬率帳下屯茶寮  
使各營分兵與湖兵相會夾勦遁賊初五日知府邢

陽川全錄卷之二  
三十三  
珣又破上新地巢破中新地巢破丁新地巢初七日  
知府唐淳又破杉木均巢破原陂巢破木里巢十一  
日知縣張戩破板嶺巢破天台菴巢十三日又破東  
桃坑巢破龍背巢連日各擒斬俘獲數多其間巖谷  
溪壑之內饑餓病疹顛仆死者不可以數於是桶岡  
之賊畧盡臣以其暇親行相視形勢據險立隘使卒  
數百斬木棧崖鑿山開道又使典文梁儀領卒數百  
相視橫水創築土城周圍千餘丈亦設隘以奪其險  
議以其地請建縣治控制三省諸徃斷其往來之路  
乃經營十六日據防遏推官徐文英呈稱廣東魚

黃等巢被湖兵攻破賊黨男婦千餘突往鷄湖新地  
穩下朱雀坑等處臣復遣知府季勳分兵趨朱雀坑  
等處知府伍文定趨穩下鷄湖等處守備指揮郊文  
知府邢珣趨上新等處各相機急勦二十日知府伍  
文定兵擊賊於穩下寨西峯寨苦竹坑寨長河壩巢  
黎坑巢二十三日守備指揮郊文知府邢珣擊賊於  
上新地巢知府伍文定又追擊于鷄湖巢十二月初  
三日知府季勳擊賊於朱雀坑寨狐狸坑巢擒斬首  
從賊徒俘獲賊屬奪獲賊仗數多於是奔遁之賊始  
盡然以湖廣二省之兵方合雖近境之賊悉以掃蕩

陽明全集別錄 卷之二 三十四  
而四遠奔突之虞難保必無乃留兵二千餘分屯茶  
寮橫水等隘而以是月初九日回軍近縣以休息疲  
勞候二省夾攻盡絕然後班師兩月之間通計搗過  
巢穴八十餘處擒斬大賊首謝志珊藍天鳳等八十  
六名顆從賊首級三千一百六十八名顆俘獲賊屬  
二千三百三十六名口奪回被虜男婦八十三名口  
牛馬騾六百八隻匹賊仗二千一百三十一件金銀  
一百一十三兩八錢一分總計首從賊徒賊屬牛馬  
賊仗共八千五百一十五名顆口隻件俱經行令轉  
解紀功官處審驗紀錄去後今呈前因叅照大賊首

藍天鳳謝志珊等盤據千里荼毒數郡僭擬王號區  
謀不軌基禍種惡且將數十餘年而虐焰之熾盛毒  
流之慘極亦已數年于茲前此亦嘗夾勦曾不能損  
其一毛屢加招撫適足以長其桀驁乃今驅卒不過  
萬餘用費不滿三萬兩月之間俘斬六千有奇破巢  
八十有四渠魁授首噍類無遺此豈臣等能賢於昔  
人是皆仰仗 朝廷威德之被廟堂處置得宜既假  
臣以賞罰之權復專臣以提督之任故臣等得以伸  
縮自由舉動如志奉 成算以行事循方畧而指揮  
將士有用命之美進止無掣肘之虞則是追獲獸兎

之捷實由發縱指示之功臣等偶叨任使亦安敢冒  
非其績夫謀定於帷幄之中而勝決於千里之外  
命出於廟堂之上而威行於百蠻之表臣等敢為  
朝廷國議有人賀且自幸其所遭得以苟免覆餗之  
戮也及照監軍副使楊璋叅議黃宏領兵都指揮僉  
事許清都指揮使行事指揮使郊文知府邢珣李敷  
伍文定唐淳知縣王天與張戩指揮余恩馮翔縣丞  
舒富隨征叅謀等官指揮謝和馮廷瑞姚璽明德同  
知朱憲推官危壽徐文英知縣陳允諧黃文鸞宋塔  
陸敬千戶陳偉高睿等以上各官或監軍督餉或領

兵隨征悉皆深歷危險備嘗艱難各效勤苦之力共  
成克捷之功俱合甄錄以勵將來伏願 皇上普彰  
廟堂之大賞兼收行伍之微勞激勸既行功庸益集  
自然賊盜寢息百姓安生則地方幸甚臣等幸甚

立崇義縣治疏

十二年閏十  
二月初五日

據江西巡守嶺北道兵備副使楊璋左叅議黃宏會  
呈據南安府知府李敷呈備所屬致仕省祭義官監  
生楊仲貴等呈稱上猶等縣橫水左溪長流桶岡關  
田鷄湖等處賊巢共計八十餘處界乎三縣之中東  
西南北相去三百餘里號令不及人跡罕到其初葦

陽明全集卷之三  
賊原係廣東流來先年奉巡撫都御史金澤行令安  
插于此不過砍山耕活年深日久生長日蕃羽翼漸  
多居民受其殺戮田地被其占據又且潛引萬安龍  
泉等縣避役逃民并百工技藝遊食之人雜處于內  
分群聚黨動以萬計始漸虜掠鄉村後乃攻劫郡縣  
近年肆無忌憚遂立總兵僭擬王號罪惡貫盈神人  
共怒今幸奏聞征勦蒙本院親率諸軍搗其巢穴  
擒其首惡妖氛為之掃蕩地方為之底寧三縣之民  
懽欣鼓舞如獲更生訪得各縣流來之賊自聞夾攻  
消息陸續逃出頗衆但恐大兵撤後未免復聚為患

合無三縣適中去處建立縣治實為久安長治之策  
等因到道隨取各縣鄉導千軍營研審查得前項賊  
巢係上猶大庾南康三縣所屬上猶縣崇義上保鴈  
湖三里先年多被賊殺戮田地被其占據大庾縣義  
安三里人戶間被殺傷田地賊占一半南康縣至坪  
一里人戶皆居縣城田地被賊阻荒總計賊占田地  
六里有半隨蒙本院委領兵知府邢珣知縣王天與  
黃文鸞親歷賊巢踏勘三縣之中適均去處無如橫  
水原係上猶縣崇義里地方山水合抱土地平坦堪  
以設縣隨會同分守左叅議黃宏議得合無于此建

易月全集刊本  
卷之三  
三

陽明全集卷之三  
立縣治盡將三縣賊人占據阻荒田地通行割出緣  
里分人戶數少查得南康縣上龍一里崇德一里亦  
與至坪相接緣至坪三都雖非全里然而地方廣闊  
錢糧數多堪以折作一里合割併屬新縣其間人戶  
數少者田糧尚存招人佃買可以復全縣治既設東  
去南康尚有一百二十里要害去處則有長龍西去  
湖廣桂陽縣界二百餘里要害去處則有上保南去  
大庾縣一百二十餘里要害去處則有鉛廠俱該設  
立巡檢司查得上猶縣過步巡檢司路僻無用宜改  
移上保備田呈詳奉批看得橫水開建縣治實亦事

不容已但未經奏請須候 命下方可決議兼之工  
程浩大一時恐未易就今賊勢雖平漏殄尚有且容  
遵照本院欽奉 勅諭隨宜處置事理先於橫水建  
立隘所以備目前不測之虞除委典史梁儀等一面  
豎立木柵修築土城修建營房外查得橫水附近隘  
所如至坪鴈湖賴塘等處盜賊既平已為虛設其附  
近村寨如白面長潭杰壩石五過步果木烏溪水眼  
等處居民訪得多係通賊窩主及各縣城郭村寨亦  
多有通賊之人合將各隘隘夫悉行撥守橫水其通  
賊人戶盡數查出編充隘夫永遠守把其不係通賊

者量丁多寡抽選編僉輪班更替務足一千餘名之  
數責委屬官一員統領常川守把遇有殘黨嘯聚出  
沒即便相機剿捕候縣治既立人煙輳集地方果已  
寧靖再行議處裁損其開建縣治本院親行踏勘再  
四籌度固知事不可已但舉大事須順民情兵革之  
後尤宜存恤仰該道會同分守等官再行拘集地方  
父老子弟多方詢訪必須各縣人民踴躍鼓舞爭先  
趨事然後興工庶幾事舉而人有子來之美工成而  
民享偕樂之休仍呈撫按等衙門公同計議施行等  
因依奉會同叅議黃宏遵照批呈事理先於橫水



690921

